

سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ١٣ أكتوبر ١٩٦٨

الحاضرون

القومى، كمال هنرى أبدير.. للمواصلات، فريق أول محمد فوزى.. للحربية، محمد حلمى مراد.. للتربية والتعليم، محمد عبد الله مرزبان.. للتموين والتجارة الداخلية، إبراهيم زكى قناوى.. للرى، على زين العابدين صالح.. للنقل، أحمد مصطفى أحمد.. للبحث العلمى، السيد جاب الله السيد.. للتخطيط، حسن حسن مصطفى.. للإسكان والمرافق، محمد بكر أحمد.. لاستصلاح الأراضى، عبد العزيز محمد حجازى.. للخرانة، محمد حافظ غانم.. للسياحة، محمد صفى الدين أبو العز.. للشباب، ضياء الدين داوود.. للشئون الاجتماعية وللدولة لشئون مجلس الأمة، عبد العزيز كامل.. نائب وزير الأوقاف.

الرئيس جمال عبد الناصر، حسين الشافعى.. نائب الرئيس ووزير الأوقاف، الدكتور محمود فوزى.. مساعد رئيس الجمهورية للشئون الخارجية، صدقى سليمان.. نائب الرئيس وزير الكهرباء والسد العالى، كمال رفعت.. للعمل، عزيز صدقى.. للصناعة والبترول والثروة المعدنية، عبد المحسن أبو النور.. للإدارة المحلية، ثروت عكاشة.. للثقافة، محمد أبو نصير.. للعدل، سيد مرعى.. للزراعة والإصلاح الزراعى، حسن عباس زكى.. للاقتصاد والتجارة الخارجية، عبد الوهاب البشرى.. للانتاج الحربى، محمد لبيب شقير.. للتعليم العالى، محمود رياض.. للخارجية، شعراوى جمعة.. للداخلية، أمين هويدى.. للدولة، محمد فائق.. للإرشاد

المحتويات

الصفحة

الصفحة	الموضوع
١	١- السياسة الزراعية
١٧	٢- نقل المصانع من منطقة السويس والإسماعيلية خارج مرمى العدو
٢١	٣- الدفاع المدنى بالنسبة لكل مدن الجمهورية
٢٢	٤- الاهتمام بتصدير كمية القطن المطلوبة للاتحاد السوفيتى مع وصول الأسلحة الأخيرة
٢٦	٥- توفير أجهزة الدفاع المدنى للبوليس، وتأمين الدفاع العسكرى وصد الهجوم الكيماوى والبيولوجى، مع تكثيف الدفاع المدنى عن القاهرة والإسكندرية
٣٨	٦- مراجعة تنفيذ التهجير من مدن القناة
٥٦-٤٦	٧- شروط عضوية اللجنة التنفيذية العليا، ونظام عمل اللجنة المركزية للاتحاد الاشتراكى ولجانها الدائمة

سرى للغاية

قرارات مجلس الوزراء

فى ١٣/١٠/١٩٦٨

بحث بعض الموضوعات الهامة غير الواردة فى جدول أعمال المجلس، وفى مقدمتها وسائل العمل السياسى الداخلى والدولى، كما بحث الموقف العسكرى. ثم انتقل المجلس الى بحث المسائل الواردة بجدول الأعمال ومن بينها.. موقف تسويق القطن والمشاكل المتعلقة بالتكديس وتأخير صرف الثمن وشكوى الفرز. وقرر المجلس أن يجتمع وزير الاقتصاد والزراعة لبحث هذا الموضوع، على أن تتخذ الإجراءات الفورية لإزالة أسباب شكوى الفلاحين.

كما بحث المجلس السياسة الزراعية بصفة عامة.

كما أن المجلس بحث الأوضاع المتعلقة بالمهجرين من منطقتى القناة وسيناء، وسياسة الإعاشة والإسكان المتعلقة بهم، وكذلك رعاية الطلبة من أبناءهم وتيسير سبل معيشتهم وتوفير الجو اللازم لانتظامهم فى دراستهم.

سرى للغاية

محضر اجتماع مجلس الوزراء برئاسة الرئيس جمال عبد الناصر
القاهرة، قصر القبة فى ١٣ أكتوبر ١٩٦٨

عبد الناصر: القطن ماشى ولا كلام إن الشركات مبتاخذش.

مرعى: السنة دى يعنى؟

عبد الناصر: آه.

مرعى: هو فيه تأخير شوية من الشركات الصرف والشيكات، وبعدين اجتمعت معاهم أنا من أسبوع أو خمس أيام وابتدى رئيس مؤسسة القطن بيلف الأرياف فعلا، وابتديت العملية تمشى من ثلاث أربع أيام.

عبد الناصر: هل فرق النظام بتاع الشراء الأولانى عن النظام الجديد؟

مرعى: هو يعنى أقدر أقول: لأ.. مادانيش النتيجة اللى أنا متصورها.

عبد الناصر: لأن الشركات بتتفق.. اتفقوا مع بعض!

مرعى: هم الأول ابتدوا كويس جدا، وبعدين فرازين التحكيم لما جم إدوا الربع رتبة والنص رتبة الزيادة، فبناء على ذلك الفرازين بتوع الشركات خوفا على نفسهم يعنى من المسئولية ابتدوا إنهم يبقوا فى الجانب الأحوط؛ وترتب على كذا إنه حتى فى اجتماع الشركات طلبت إلغاء فرازينها على اعتبار إنها تعود الى فرازين التحكيم فى الأصل، إنما مداناش النتيجة وبرضه يعنى فيه تحسين فى الرتب الأول أحسن من الأسبوع التانى لعملية التسويق.

وبرضه فى النظام العام مازال فيه ثغرات أنا حاسس بيها، برضه فى النظام العام اللى احنا طبقناه فى باقى الجمهورية بغير الشركات. إنما العملية يعنى هستدعى تفكير أعمق بالنسبة لعملية القطن السنة اللى جاية، ويمكن يبقى أقعد أنا والأخ حسن على ضوء التطورات اللى احنا شوفناها السنة دى بعد إلغاء عملية التسويق، ونشوف إيه الحل اللى موجود؛ لأنه لا يمكن معاملة المحصول الرئيسى بالصورة اللى حصلت السنة دى.

سرى للغاية

عبد الناصر: يعنى قطعاً السنة دى الناس برضه بتشتكى زى ماكانت بتشتكى؟

مرعى: أيوه.. أنا حاسس بيها وعاملين ضغط فيها.

عبد الناصر: مافيش حد عنده فكرة إنت جى من أمريكا يعنى.

زكى: أنا شوفت إمبارح والنهارده أصل من قبل ما أسافر، يعنى هو الواقع إنه أولاً: الأرقام تثبت حاجات كتير، والقطن لما بيتم فرز الفصيل فى النهاية فى إسكندرية.. هل هذا الكلام صحيح ولا؟ وأنا جيببت بيان فرز الأقطان واللوطات اللى حصل عليها التحكيم وبعدين رحى إسكندرية اللى هتصدر، يعنى لاقيت إن فى إسكندرية بتخسر الشركات.. جيببت السنة اللى فاتت مثلاً لاقيت إن الشركات خسراة فى الداخل ٥ مليون جنيه، فخرارة الداخل عبارة عن فرق بين اللى دفعته وبين السعر فى إسكندرية. طبعاً هى بترجع تكسب؛ لأنها بترجع بتبيع الجود وحاجة وبتعمل فلترة وبتحمل المستورد بره وخاصة الدول الشرقية، بتحملها مثلاً نسبة جايز تكون عالية من على الغرب كمان.. يعنى فيه مكسب من الناحيتين. هو الواقع زى ما قال الأخ سيد، هو الموضوع يمكن نعود للنظام التانى؛ يعنى الحقيقة هو النظام كله فيه خطوة جريئة أسهل بكثير ولو نرجع للنظام الأولانى..

عبد الناصر: الأولانى اللى هو؟

زكى: يعنى ندى فيه حرية للشركات للنظام المطبق النهارده بحرية، بدل ما شركة واتنين أو ثلاثة بس كنا اتفقنا إننا ندخل قطن لمخازن خصوصية ونسمح للشركات كلها تحدد للفلاح. هو الفلاح ليه بنقول له نشترى القطن ده بسبعة؟ هو مايعرفش أبدا عمره مايعرف جود أو فولى جود عمره مايفرز ما هوش فراز؛ واحد يقول له: القطن ده بـ ٧ واحد يقول له: بـ ٨ وواحد بيقول له بـ ٦,٥، فببلاقى المشتري ويحس بمكسبه هو الشخصى ونتيجة جهده، كونه حس برتبته وبيأخذ تحسين له بيبقى مافيش شك إن فيه عائد عليه هو مباشرة.

سرى للغاية

هو الموضوع بالنسبة للشكاوى، فيه شكاوى قالوا: إن فيه تأخير فى الصرف، أنا مش شايف إن فيه تأخير لأن أنا عملت حسة النهارده لقيت إن بالنسبة لمراكز التوزيع التجميع وبالنسبة لعدد المراكز وعدد الأكياس، يعنى المحصول هيتدفع كل تمنه وينتهى فى حوالى ٧ أسابيع. عمره ما يمكن محصول قطن ينتهى فى ٧ أسابيع، كان يقعد ٥ ، ٦ أشهر. وبعدين الضغط على المراكز، هيرجع يقول لى الضغط على المحالج ورجع نواجه مشكلة تكدر إسراع ضغط على المحالج إنها تحلج والرتب تبقى أقل، تشتغل فى المحالج لبعد الضهر أو بالليل وبالتالى نبص نلاقى فيه..

عبد الناصر: برضه النظام فيه مشاكل!

مرعى: أنا مابقولش النظام سليم لا.

عبد الناصر: والناس نتيجة لهذا السنة الجاية برضه مش هتزرع قطن هيقولوا مش هنزرع!

داوود: هو الحقيقة أنا كنت فى الريف يعنى يمكن فى بنى سويف وفى محافظة دمياط والدقهلية خلال الأسبوع اللى فات، فمافيش شك إن فيه شكوى عامة وفيه مقارنة ما بين اللى بيتم السنة دى والسنة اللى فاتت، وصلو لدرجة إنهم بيفضلوا ماكان ماشيين عليه السنة اللى فاتت؛ أولا من ناحية إنه حاسين بان فيه شبه اتفاق بين الشركات..

عبد الناصر: هل الشركات فعلا؟

داوود: مافيش المنافسة اللى كانت متوقعة إنها تحصل بين الشركات.

٢- إنه البطء فى الفرز يعنى حتى عملية تعقيد إن بتيجى شركة وتاخذ عينة وتدى رتبة، بعد خمس أشهر تقوم تيجى شركة ثانية علشان تدى رتبة أو بعد عشر أيام، فيضطر العميل إنه يفضل رابط نفسه فى الشونة مثلا عشرين يوم علشان بييجى واحد ورا واحد وبعدين النتيجة تنتهى الى نفس العملية، وبعدين وجدت إن فيه ناس يمكن بقالهم عشرين يوم وخمسة وعشرين يوم مواقفهم معلقة ماالنتهتس الى شئ!

فى الحقيقة يعنى النظام محققش نفس الأهداف اللى احنا كنا بنفكر إنه يمكن تعظيم عملية المنافسة تبقى أفضل من السنة اللى فاتت.

سرى للغاية

وبعدين عملية الفرازين، مهماش محل ثقة زى السنة اللى فاتت لأنه مهماش الجهة القديمة، النهارده بيمثلوا طرف ومافيش طرف تانى علشان يقدر يقول وجهة نظره؛ السنة اللى فاتت كان فيه هيئة تحكيم مختلفة تماما مش مرتبطة بحد بتقدر يكون تحكيمها أفضل.. ففى الحقيقة يعنى سمعت كلام كثير فى هذا المجال.

عبد الناصر: يعنى فيه فى الريف كلام يعنى والورق بقى مافيهش الكلام ده موضوع تانى!

زكى: بس فيه نقطة: فيه نظامين فى القطن حاليا.. يعنى فيه نظام تسويق حر اللى هو بنجربه اللى هو بالنسبة ده مثلا بيطبق فى دمياط على المنوفى كله اللى هو لأول مرة نطبقه، اللى هو بتخش فيه شركات منافسه القطر كله، مافيش اتفاق مع الشركات أبدا ده مالوش دعوة ده ماشى بالنظام العادى مع التحسن فيه. فكان اتعمل النظام ده على أساس كل اللى نعمله تسويق حر، قلنا: نطبق التسويق فى الحزام ده ونشوف إذا نجح نيجى السنة الجاية نوسعه، إذا فيه عيب نصححه. فلما نيجى نشوف النظام، نقول إيه العيب فى النظام وإيه العيب اللى فى النظام التانى.. فيعنى اللى برجوه إن مانطبقش اللى هنا على هنا.

أنا مشترك إن فيه شكوى، وأنا أول من أشكى من الشكوى لأن أنا عايز محصول ومش عارف أصدر، وأنا عاوز ١١ مليون قنطار مش عاوز ٨ ولا ٩ ولا ١٠ مافيش شك فى ذلك، وإحنا بنرحب إننا نزود المحصول وبنرحب إننا ندى للمنتج زيادة. وإحنا سبق درسنا الموضوع وكانت أساس الشكوى الحقيقة أسعار القطن، وكنا فكرنا فى مشروع إننا نزود بحيث إنه مايقاش على كل القطن على الزيادة اللى فى الإنتاج؛ علشان أشجع الفلاح وبعدين أعمل نوع من التحسين فى التسويق التعاونى أو أدى لطرف آخر.. فلا شك إن ده هيحسن الموقف.

عبد الناصر: يعنى الحقيقة إحنا مش عايزين ندخل فى أنظمة كل يوم ونغير النظام كل سنة، لازم ندرس الموضوع ونرسى على حاجة أساسية بحيث إن إحنا نريح الفلاحين. وبعدين هو تريح الفلاحين بيريح البلد كلها، يعنى أنا مثلا اللى سامعه من الهند إن زيادة الإنتاج الزراعى فى الهند مآثر على السنة دى بالذات؛ شوف الوضع فى الهند تعبان أثر على الوضع كله فى الصناعى وفى كل الأوضاع فى البلد.

سرى للغاية

مرعى: إذا سمحت لى سيادتك أنا هخرج عن موضوع القطن؛ لأن كان فيه موضوع عايز أثيره برضه فى ناحية تربيح الفلاحين دى وبعدين أرجع للقطن تانى.

دلوقتى المشاهد فى القطاع الريفى عمليتين تاعبينه جدا.. عملية الغرامات المتأخرة على عدم توريد للمحاصيل السابقة، أنا درست هذا الأسبوع موضوع الغرامات وسيادتك عارف إنه فرض مجعول على القمح وفرض مجعول على الرز وفرض مجعول على العدس وفرض مجعول على السمسم والفول السوداني؛ لما الظروف الاقتصادية أحت كان فيه هذا الفرض أيام تطور القمح.

الغرامات دى بلغت ٥,٥ مليون جنية، لما بشوف اللى احنا حصلناه من ال ٥,٥ مليون جنية لاقيته ٤٠٠ ألف جنية من تاريخ فرض الغرامة الى اليوم! وهى غرامة نظرية يعنى لا يمكن لنا عمليا إن احنا نحصل هذه الغرامات إلا لو بهدلنا القطاع الريفى كله؛ لأنه كان مثلا غرامة عدم التوريد الى ضريبة الرز الواحدة ٥٠ جنية، فلما جينا السنة دى إحنا سيبنا فى القمح قلنا حيازة فدان أو أقل ماناخذش قمح ترتب على كدا نتائج عظيمة جدا.

أولا: إنه وزارة التموين فى القمح بتاعها وفى التموين الداخلى قل بنسبة ١٥٪؛ بدل ما كان وزارة التموين بتاخذ القمح فى الشون وترجع تنقل من شونة لشونة وترجع تودى القرى، فقل السحب من وزارة التموين من القمح الى ١٥٪.

ثانيا: انعكس على سعر الدرة، الدرة النهارده ب ٢٥ قرش للكيلة وأصبحت مده لأول مرة عكسية، إنهم بيطالبونا وبيطالبوا وزارة التموين إنها تستلم درة بالسعر المحدد فانعكس علينا مثلا فى محصول زى العدس؛ إن العدس أقرت له أسعار ١٢ و ١٥ مع التطور اللى حاصل فى زراعة العدس اللى ببقل من حياض الى مشروعات وده نجح فى أسبوط يعنى أسبوط السنة دى محصولها فى المتوسط جايب ٥ أردب وكسر، والكميات اللى دخلت أكثر من السنة اللى فاتت بكتير لأن غيرنا طريقة زراعة العدس فى أسبوط وبنحاول نغير طريقة زراعة العدس أيضا فى قنا، واتفقنا مع وزير الرى بالنسبة لرى هذه المناطق.

التفكير اللى جاي فى ذهنى النهارده وبحب أعرضه على سيادتك وعلى المجلس

هو الآتى..

إنه بالنسبة لمحصول العدس، أنا ماستلمش أى مجعول بسببببب يطلعه أى محصول عدس، لما المحصول هيطلع هو بيتباع النهارده فى السوق ب ٢٢ جنية وب ٢٠ جنية. لما المحصول هيطلع أمر من اتنين: البنوك التجارية وبنك التسليف، وبقول البنوك التجارية لأن فى الواقع شايف البنوك التجارية لازم يبقى لها role فى بنك التسليف وإلا مش هنقدر

سرى للغاية

نصلح حال بنك التسليف بالصورة اللى هو موجود بيها أبدا؛ يعنى بيشتغل تموين وبيشتغل تجارة وبيشتغل فى إقراض، مافيش بنك فى العالم بالشكل ده ولا يمكن ليه هو بصورته الحالية إنه يعمل بهذا الشكل.. يبقى البنوك التجارية وبنك التسليف بيخشوا مشتريين للعدس.

بنتجى هنا نقطة وحيدة تموين الجيش بالنسبة للعدس: فى الواقع إنه ده مردود عليه إن تموين الجيش بيتم النهارده من العدس المستورد من الخارج لتناقص إمكانيات سنة بعد أخرى بالنسبة لعملية تحويل الحياض.

فأنا بقتح - أصل دلوقتى ميعاد زراعة العدس - لو أطلقنا زراعة العدس خالص وقلنا للناس إن مافيش حيازات، وقلنا للناس إن مافيش سعر أو بنضمن حد أدنى للسعر أو بنطلق السعر؛ إن ده هيكون مشجع لبتوع قنا إنهم يقلدوا بتوع أسيوط فى الزراعة بتاعتهم، وبالتالي بيدينى ناتج فى محصول ثانوى هو بيجيبلى صداع فيما لو إنتاجيته مكانتش زائدة. مع إعفاء الغرامات المتأخرة على العدس يعنى أنا عندى بيان بالغمات الموجودة على العدس محصلناش منها غير ٥ آلاف جنيه عمليا، ومانقدرش نحصل فى قنا أو سوهاج لأن هى مناطق متخلفة من الناحية الزراعية ومانقدرش نحصل من الناس حاجة.

العيب بتاع الكلام اللى أنا بقوله ده، إنه جايز يقال إنه اللى ورد لك خد اللى ورد وسمع الكلام خد سعر أقل من اللى باع فى السوق السوداء؛ أنا معترف إن هذا عيب قائم، إنما يساويه إن أنا أحط المحصول على أساس سليم بحيث إن الناس تعاود نهضتها بالنسبة لمحصول العدس.

وبالنسبة للغمات بصفة عامة بدى أقول الآتى:

إن غرامات الرز، اللى بتبلغ مبلغ كبير جدا أظن ٢ مليون جنيه لوحدها اللى هى الرز المتخلف مع توحيد سعر الرز اللى هو القرار اللى صدر أخيرا؛ أقول: إن كل من يورد رز هذا العام باعفيه من الغرامات الثابتة كلها؛ لأن هو عمليا ماتحصلش، وبعدين بتخش فى الفيشة بتاع كل واحد، ودى اللى بتعمل لنا وجع دماغ فى الحسابات دلوقتى لأن الحسابات بعد المشوار اللى احنا عملناه فيها أصبحت مقيدة، إنما فى كل بطاقة فيه الغرامة.. فيه غرامة ٥٠ جنيه مثلا لراجل زارع فدان عدس، اللى يلاقى فى بطاقته إنه متقيد ٥٠ جنيه لما بيروح البنك يقوم البنك يقول له إدفع لى ٥٠ جنيه الأول، فبالتالى مايقدرش يدفع ال ٥٠ جنيه!

أنا رجائى إن احنا ننظر بالنسبة للغمات، ودى هتريح القطاع الريفى يعنى تريح قوى جدا.. نطلق العدس خالص كمحصول سنوى، بننظر مع السيد وزير التموين

سرى للغاية

فى هذا الموضوع كله، ننظر فى السمسم كمان لأن فيه محاصيل بسيطة إحنا قفلناها وبمجرد ما قفلناها بالحيازات ابتدت ترد لها رد فعل عندى فى المساحات وفى المحصول أيضا. وبفضل هما محصولين أساسيين هما اللى أنا هاخذ عليهم الحيازة.. هما الرز والفل السودانى، ليه الرز والفل السودانى؟ لأن الرز بيهمنى الحصيلة بتاعته بالنسبة للصادر للخارج، الفول السودانى كذلك لو سيبته مباح يهرب وينزل كله فى المقالى والحاجات دى يعنى بقى نوع من أنواع الاستهلاك بينما هما المحصولين محصولين تصديرين.

أنا بعتمد لو سيادتكم وافقت على كدا، بقدر أدرس مع السيد وزير التموين التفصيلات دى، واعتقادى إنها بتريحنا فى القطاع الريفى تريح كبير لأن الشكوى منها عامة. لما نيجى فى العدس، السنة دى فى قنا إحنا ٤٥ فدان يتزرعوا، كل يوم عندى أعضاء المؤتمر بتقول: مش عايزين نزرع عدس! نفس الصورة اللى حصلت فى القطن، طب ليه مش عايزين يزرعوا عدس؟ غرقوا لنا الأرض؛ لأن الطريقة اللى احنا عملناها فى أسيوط ونجحت، إن احنا بنغرق الأرض فعلا وماقاش فيه خيار، فإحنا بنغرق الأرض ١٥ سم وبنسيب الـ ١٥ سم ١٥ يوم، وبعدين بنبدر بيطلع محصول أحسن من أيام الحياض، وأسيوط طبقت كدا السنة دى وهى طبقتها فى عموم أسيوط.

لما جينا فى قنا نطبق العملية، السيد وزير الرى وأنا درسنا هذه العملية لقينا مايقدرش يغمر يعنى عنده استحالة فنية بالنسبة للغمر، فقال لى: أنا هديلك أعلى منسوب فى التربة يعنى أنا هشىل بماكينات برضه وأغرق الأرض ١٥ يوم وهتبقى التكلفة عالية، ولما التكلفة تبقى عالية وأنا رابط السعر بـ ١٢ جنيه و ١٥ جنيه وربط عليه حيازة، يبقى بالتالى أنا باحط الفلاح ويزنقه فى النص مايقدرش يتصرف، بينما أنا لو أطلقتها أنا أملى - ولو إن أملى مش السنة الجاية مباشرة - هيدينا نتيجة أملى للسنة اللى بعد اللى جاية هتدينى نتيجة بالنسبة للعدس.

أنا باعرض ده على سيادتكم.

سليمان: أنا باتفق تماما مع الأخ سيد فى موضوع العدس على إننا نطلقه، مش بس العدس يعنى محاصيل أخرى. فى الواقع إن عملية الحيازة كنا يعنى بنعملها بدون مقتضى مثلا فى الدرة فى القمح يمكن كانت لمواجهة نقص موسمى، إنما طالما إننا بنحصل على القمح اللازم للاستهلاك فى المدن من الخارج، يبقى مايفيش موجب إنى أحط حيازة على القمح أو على الدرة، بالعكس لما سعره يرتفع شويه مش هيجرى حاجة لأنه هو على كل حال يباع فى السوق السوداء. وبعدين خسائر الدولة من أى حيازة تتجاوز ٨ جنيه فى الطن؛

سرى للغاية

سواء فى القمح أو فى الدرة أو فى العدس أو فيما أشبه ذلك.. يعنى التكلفة كبيرة جدا بدون مقتضى.

فأنا متصور لما نطلق عملية الحيازة - نمنع الحيازة - فى مثل هذه الأصناف الأسعار بطبيعتها بتهدى وتستقر.

فأنا متفق تماما فيما يختص بالგრامات، ممكن شطبها بالنسبة للعدس بس هل تعلن أو لا تعلن؟ يعنى هو ده السؤال. طالما يعنى معلوماتنا إن مثلا الغرامات بتاعة الرز السنة اللى فاتت ماتحصلش منها حاجة أبدا، فطالما إنها مابتحصلش يبقى إيه المانع إن أنا أعلن؟ بالرغم من إن مابتحصلش غرامات من حد فالتوريد السنة اللى فاتت فى حيازة الرز كانت منخفضة.

مرزبان: وبرضه اتكلمت مع السيد وزير الزراعة فى الموضوع، وأنا متفق معاه إن عملية الحيازات هى فى حد ذاتها كعملية مهياش محبوبة من الفلاحين ومن المنتجين، وبيتحاولوا عليها بشتى الوسائل، وبتبقى فيه نوع من المقاومة. وبرضه أتفق معاه فى عملية الغرامات لأن أحيانا الغرامات كانت بتفرض مهياش حتى فى تقديرها عادلة.. بمعنى الفرق ما بين إنه هيديه لى ويبيعه بره؛ يعنى الرز كان بيدهولى بمقدار يقدر يبيعه ب ١٠ - ١٥ جنيه بالكثير أوى زيادة بره، ومع ذلك بيع بنفس السعر ويبرى إن المعاملة مع التاجر أسهل وأيسر وبسرعة عن لما يروح فى بنك التسليف.

وبعدين لما يتفرض على ضريبة الرز أم ٢٤ جنيه السنة اللى فاتت، لو موردهاش يدفع ٥١ جنيه يبقى عليه مثلا ٥ - ٦ ضرائب عليه ٢٠٠ - ٣٠٠ جنيه مش معقول! دى قابلتنا فى العدس وفى كثير من المحاصيل، وأنا جولى الناس بتوع قنا وقالوا لى: إحنا الحقيقة ماوردناش السعر مجزى يعنى كان ١٠ جنيه و١٢ جنيه، وبعدين عملناه السنة دى ١٢ و١٥، وبعدين قلنا: حتى اللى ورد أى كمية إضافية والمتأخر من السنة اللى فاتت يبقى كله ب ١٥ جنيه. ولعلمنا اللى كان بيتباع كان بيتباع ب ١٥ جنيه للتجار كان هو ده السعر السائد والسعر كويس أوى؛ لأن اللى بيلاقى عليه كل واحد ٧٠ - ٨٠ جنيه غرامات لأنه ماوردش السنة اللى فاتت. وقالوا: لو نضمن إن ميطالبناش بالغررامات إحنا نرحب إن احنا ندى كل الكمية لبنك التسليف لأن السعر كويس والسعر ١٥ جنيه بيتباع فى السوق الكيلو ب ٢٠ قرش.

هى النقطة بس الوحيدة لو أنا أطلق العدس، وهى سلعة شعبية بالإضافة الى القوات المسلحة واحتياجاتها، وإحنا النهارده بنديها حتى متوسط تكلفة الاستيراد اللى هو ١١ قرش للكيلو، لكن فيه السجون والمستشفيات والمدارس وبعدين كسلع شعبية حتى فى

سرى للغاية

السوق لو أطلقها هتبقى بـ ٢٥ قرش الكيلو. إحنا النهارده بنبيعها بـ ٧ صاغ، إحنا رفعناها علشان تخفيف برضه العبء قرشين صاغ خليناها ٩ صاغ و ١٠ صاغ للمجروش، إنما هي بتتباع بـ ١٨ قرش و ٢٠ قرش، فهل هاسمح إن هي لو أسببها تتباع بدل ٧ صاغ و ٨ صاغ و ١٠ صاغ ممكن نصل لـ ١٢ يبقى معقول، إنما تبقى بـ ٢٥ قرش بـ ٣٠ قرش هتبقى مش معقول أبدا!

وبعدين العملية اللي بيقول عليها، أنا بعتقد إنها تاخذ سنتين على الأقل علشان تصل الى الحد اللي تنتسح المساحة الى إنه يزيد، لكن الاقتراح بشيل الغرامات عن العدس ده هيشجعهم، مع توحيد السعر على ١٥ جنيه بدل ١٢ و ١٥ بيتقلل جدا الخسائر لو أنا أضمن - وأنا بعتقد - إن هم يقدروا يوردوا بـ ١٥ ونقدر ناخذ ضريبة نص عن كل فدان فى أول سنة بسعر موحد ١٥ جنيه. لو أعلناه من دلوقتى ممكن تيجى كمية؛ لأن احنا جالنا فى من أسيوط السنة دى حوالى ١١٠٠ طن زيادة، الكمية اللي جاتلنا من قنا أقل ٢٠٠ طن بس عن السنة اللي فاتت؛ يعنى الفرق مهوش كبير أوى، لو إن مافيش نقطة الغرامات اللي أنا حسيته أنا متأكد فرق كمية اللي هتيجى أكثر بكثير.

وبعدين هو كان حصل برضه فى نفس عملية الحيازات وعن طريق بنك التسليف صعوبتين؛ لأن هم لما راح نفس المحافظ كان بيشتكى وكانو بيشتكوا إن هم مش لاقبين حد يستلم منهم العدس، وبعدين تبين إن هم ماعملوش مركز تجميع فى المراكز علشان ياخدوا العدس. اتصلنا ببنك التسليف، على ما عمل مراكز التجميع كانوا باعوا للتجار. دخلنا بنك مصر، إنت مشتري وقدر يجيبنا حوالى ٧٠٠ طن أو ٨٠٠ طن، ولكن كانت العملية الحقيقية متأخرة. إحنا ممكن نشيل الغرامات وندى سعر مجزى بما يسمح على الزيادة.

لكن أقول برضه كسلعة شعبية يمكن نتردد شوية إن احنا نطلقها خالص، خوفا إن السنة الجاية يبقى الكيلو بـ ٢٥ قرش وتبقى العملية شكلها يبقى صعب. يعنى إحنا نقدر نخف من العملية إن احنا زودنا قرشين صاغ، دى وفرتلنا فى الميزانية السنة دى حوالى ٣٠٠ أو ٣٥٠ ألف جنيه، وعملناه محدش حس بيه يعنى فرق قرشين صاغ و ٧ صاغ أو ٨ صاغ لأنه برضه أقل من سعر السوق. لو وصلنا حتى تدريجى كده قرش فى قرشين لـ ١٢ قرش، أنا اعتقد يبقى كل مبلغ أتحملة مبلغ صغير فى سبيل سلعة شعبية زى دى.

وبعدين النقطة الثانية: إن احنا فى الاستيراد نفسه واجدين صعوبة، يعنى إذا اعتمدنا على الاستيراد فيه واجدين صعوبات. لسه كنت بتكلم مع السيد وزير الاقتصاد، أغلب البلاد المنتجة للعدس هي بلاد فقيرة - الهند وسوريا وتركيا - وهو الغذاء الشعبى

سرى للغاية

لهم، أيضا المتوفر عندهم للتصدير قليل؛ بنعمل معاهم اتفاقيات وعملنا معاهم عقود وبعدين يتحللوا منها. هو بيبيع العدس بالعملات الصعبة لبيروت، السنة اللي فاتت عملوا مثلا عملية وحاولنا نضاعف الكميات واضطرينا اشتريناها بالعملة الحرة من بيروت. يعنى بقول: حتى الاستيراد مانيش ضامنه قطعاً لازم أعتد على الإنتاج المحلى، ولأزم أشجع الإنتاج المحلى بما يكفينى هنا كسلعة شعبية موجودة هنا وسلعة شعبية من الصعب الحصول عليها، يمكن برضه لو اتكلمنا فى دى يمكن نقدر نصل الى رأى.

دى بس العيوب اللي حبيت أوضحها لو أطلقناها هادخل مشتري بالسعر الجارى فى السوق يمكن ألافه ٢٠ قرش هضطر أدخل بـ ٢٠ قرش وأبيعه بكام بالسعر الحر؟! يعنى الفرق هيبقى كبير أوى مش سعر صغير.

الشافعى: هو الحقيقة الموضوع اللي أثاره السيد الرئيس هو موضوع القطن، ويعنى يمكن الواحد بيشوف إنه سواء التنظيم بتاع السنة اللي فاتت أو التنظيم بتاع السنة دى ويمكن فيه اتفاق إن الاتنين فيهم يعنى مصاعب، والناس فعلاً ماحسيتش بالتغيير. والحقيقة إذا أدنلى السيد الرئيس، يعنى قطاع الزراعة لاتساعه والتعامل فيه إذا كنا يعنى هنمشى فيه على أساس إنه بنقضى فيه على الوسيط فى المستويات المختلفة، إذا مكانش هيقوم تنظيم قادر تنظيمياً وإدارياً بالتدريج اللي نقدر نستوعب فيه التنفيذ الناجح هنبقى باستمرار دايماً عندنا مثل هذه الشكوى.

والحقيقة يعنى الواحد مايقدرش يقول إن التسويق التعاونى اللي حصل لما بيتأخذ ككل من غير مايبحصل تدرج فيه بيبقى فيه صعوبة للتنفيذ، وأيضاً لما بنيجى نرجع لنظام يعنى ماهوش لا هو بين التنظيم وبين الإطلاق ما بين القطاع العام وما بين النظام الحر بعض الشئ. إذا كنا هنتعامل مع أفراد الفلاحين مباشرة فدى قاعدة عريضة جداً وعملية صعبة وضخمة ويعنى أنا أشك فى نجاح أى عملية من هذا النوع، إذا مكانتش تعتمد على جمعية تعاونية بنبنيتها بالتدريج على قد ما نستطيع، بحيث إنها تكون قادرة فعلاً على تنفيذ ما يطلب منها بكفاءة تطمنا على إن كل شئ هنطلبه منها فعلاً يكون ممكن.

النقطة الثانية: هى المجال اللي تسمع فيه يعنى أصوات الفلاحين كإرادة حقيقية تناقش الموضوع فى تفاصيله، ولا تصدر تعليمات فوقية إلا بالقدر اللي نستطيع فيه إن احنا تناقش هذه المسائل تفصيلاً.

الحاجة الثالثة: اللي هى بناء المخازن فى كل قرية بحيث إنها تكون قادرة على إنها تستوعب قطن القرية ككل، ويبقى التعامل مع الجمعيات فقط وليس مع الأفراد بالنسبة لهذا المحصول الرئيسى. وبعدين إحنا بنستسهل برضه تنظيمياً وإدارياً إن احنا بنجمع كل

سرى للغاية

التحصيلات على القطن بالذات، فببقي الحمل اللى بيطالب بيه الفلاح ضخم لدرجة إن يعنى الناس بتهرب من هذه الزرعة على أساس إن ده المجال لتجميع جميع المتحصلات. الحاجة الأخيرة: موضوع الاتحادات النوعية اللى تقدر فعلا تحل مشاكل كل محصول؛ بحيث إنها تكون هى الوسيلة لإعطاء مجال يتجمع فيه الناس اللى هم أصحاب المصلحة المشتركة بالنسبة لمحصول واحد يقدر يناقشوا فيه كل مشاكلهم؛ لأن المشاكل لا أول لها ولا آخر ولا يمكن الواحد يقدر يطبق أورنيك يركب على كل التفاصيل.

مرعى: إذا سمحت لى سيادتك يعنى مش دفاعا على النظام القائم ولا حاجة، يعنى أنا من واجبى إذا حسيت النظام القائم فيه ثغرات واجبى إنى بأعترف بيها وأقولها. إحنا النهارده بنجتاز مرحلتين..

المرحلة الأولى: إن إزاي نخلص الموقف اللى هو ناتج من ٣ حاجات.. الشكوى من الفرز، والشكوى من التكدس، والشكوى من صرف الفلوس. أدى جميع مشكلات الريف بالنسبة لعملية القطن. إحنا عندنا مشكلة من التلات حاجات دول، أنا شعورى إن التلات أربع أيام الأخيرة دى الحالة أحسن، وأنا عندى البيانات والحقيقة يعنى وجود الأخ حسن عباس زكى ربما يسعفنا لأنه أنا كنت باجتمع مع شركات القطن كلها وبديهم، إنما مش زى مايبقى برضه الوزير المختص هو اللى بيصدر الأوامر بالنسبة للعملية.

بالنسبة للنظام القائم، النظام القائم متملش بدون دراسة؛ درس فى مجلس الأمة باتساع وأيام متوالية ودرس فى الاتحاد الاشتراكى ودرس مع الفلاحين، يعنى مانزلش بتعليمات فوقية ولا تعليمات، إنما النظام نفسه بتاع التسويق التعاونى من تجربتنا من تاريخ ما قام الى اليوم وهو مثار شكاوى.

فيه حاجة غلط فى هذا النظام، الغلط فى هذا النظام فى رأى أنا حاجتين.. حاجة أشار لها السيد النائب الآن وأنا معترف بيها بس عابزة منى وقت، اللى هى التنظيم التعاونى وبناء المخازن. بناء المخازن السنة دى إحنا لنا ٥٠٪ من أرباح الشركات مخصصة لبناء المخازن فى الريف، وسنبدأ فى بناء المخازن فى الريف ويبقى كل قرية لها مخزن، وإنما الحقيقة مش ده العيب العيب أكثر من كده وأعمق من كده، إحنا عندنا ٢,٤ مليون حائز مفروض إن هتعامل مع ٢,٤ مليون حائز كل واحد ممكن من قنطارين وتلات قنطير وأربع قنطير.

سرى للغاية

الصورة دى لابد إنه يحصل عملية تجميع كائنا من كان، هذا التجميع سواء على مستوى جمعية تعاونية أو على مستوى شركة من الشركات مثار الشكوى موجود فيه؛ لأنه لابد أن يفرز. اللي كان بيحصل عند وجود تجارة الداخل قبل كدا، تاجر الداخل على كراهيتنا له وعلى إنه كان يلعب دور الوسيط ويجب استبعاده بالنظام اللي احنا ماشين بيه، إنما كان بيقوم بدور اقتصادى هام فى عملية التسويق. إيه الدور الاقتصادى الهام اللي هو بيقوم بيه؟ نشوف إيه الدور ونحاول نغطيه عن غير طريق تجارة الداخل. كان بيقوم بعملية التجميع على نطاق صغير وكان بيقوم بعملية الفرز على نطاق صغير؛ لأنه كمان إحنا لما نبص لنتائج فرز القطن من سنوات تطبيق التسويق التعاونى، بنجد القطن بتاعنا الفرز بتاعه نازل. هو السنة دى يمكن يكون أحسن شوية، إنما أحسن لأسباب إن المحصول يعنى فى بعض المحافظات سليم وببىدى نتيجة، والناس كانت مهتمة على أساس إنها تصورت إن هيجصل تنافس فعلى مع الشركات.

فإحنا لما جينا أجزنا تجارة الداخل خالص، أصبحنا نواجه عمليتين.. ماهى طريقة التجميع؟ وما هى طريقة الفرز؟ الاتنين دول إحنا معملناهمش صح؛ لأن التجميع عملناه فى أكياس ودى بتكلفنا فى السنة مايقرب من ٤ مليون جنيه، الفرز وانخفاض الفرز بيكلفنا فى السنة ما لا يقل عن ٥ مليون جنيه. الدولة دفعت ١٠ مليون جنيه فى عملية تسويق القطن علشان تسترضى الفلاحين ومع ذلك ده كان ضد مصالح الفلاحين؛ فلا الدولة بتنتج بالنسبة للنقد الأجنبى ولا إحنا راضين الفلاحين. إذاً يجب أن يحصل نظام التجميع بطريقة ما، ماهى هذه الطريقة؟ يصح يكون عندنا مندوبين من الشركات، يصح يكون بالاقتراح اللي بيقوله الأخ حسين وهو بناء المخازن والتنشيط التعاونى بس برضه عايز وقت.

إنما أنا يبدو لى إن الوضع الطبيعى النهارده فى تفكيرى فى المشكلة القائمة، هو إنه جهة معينة مسئولة عن تسويق القطن. النهارده سيادتكم لما تشوف الصورة هى صورة حبية يعنى على الصلة اللي بين وزير الزراعة وبين وزير الاقتصاد بيتعاونوا فيها، إنما الأجهزة جزء منها فى الاقتصاد وطبيعتها كده ولا يمكن يكون غير كدا التحكم فى الاقتصاد، ولازم يكون فى الاقتصاد الشركات فى الاقتصاد ولازم تبقى فى الاقتصاد. وبعدين بنك التسليف بيخش فى عملية التجميع وعملية التمهد الى عملية التجميع، فيعنى الصورة والمشكلة لازم تتاخذ من تحت، هل ممكن الاستعانة بمندوبين عن الشركات يقوموا بالدور اللي كان بيقوم بيه تاجر الداخل؟

سرى للغاية

وبالتالى يبقى الشراء مباشر فعلا؛ لأنه دلوقتى أنا مش متصور بعد تجربة هذا العام اللى كنا متصورين إن ٣ شركات هيتنافسوا، ماحصلتش إن الـ ٦ شركات أيضا مش هيتنافسوا؛ لأن هو نفس القطاع وهم معذورين لأنهم بدهم إنهم يكسبوا. ولو إن السنة اللى فاتت العائد اللى جه من للفلاحين كان أكثر بكثير مما نتصور - عائد فرز إسكندرية كان ١٣ مليون جنيه - ورجعناه للفلاحين؛ كل الـ ١٣ مليون جنيه رجعوا داخليا، إنما الـ ١٣ مليون جنيه بيأثروا على عقلية الفلاح ومعنويته لما بيقبض التمن الأولانى.. وده اللى دعانى السنة دى إن احنا نقول ياخذ التمن ١٠٠٪.

بالنسبة للنظام الجاى، أنا متهيألى إن احنا لازم نواجهه بشئ من التفصيل أكثر ومانخلىش أسلوب التسويق رابطنا أوى؛ لأن لما بنخلى التسويق رابطنا كل ما بنسد حته بتطلع حته. فيجب إن احنا نشوف ماهى الوسيلة لتجميع القطن على طريقة سهلة للفلاحين، هل بطريقة مندوبين الشركات؟ إذا وجد مندوبين للشركات معنى هذا إحنا معينين ٤ - ٥ آلاف واحد متعينين ما بين بنك التسليف وما بين الشركات اللى هى بتاعة تجارة الداخل. هل دول ممكن يكونوا مندوبين؟ هل يودى تنافس هؤلاء المندوبين على العدد الكبير ده هو الى تنافس فعلى؟ هل دول يصح إنهم ياكلوا الفلاح إنهم يرجعوا بيتزوه؟

ولو إنه إحقاقا للحق إنه كانت تجارة الداخل بعد تنظيمها بقانون، كان قانون صدر لتجارة الداخل فى القطن مكانش إنه الاعتداء على الفلاح كان اعتداء كبير فى القطن.. دى الحقيقة أنا باقرها وأنا ضميرى مرتاح فيها، كان الاعتداء عليه فى حدود ٢٠ - ٣٠ - ٤٠ قرش فى القنطار، إنما كانت العملية اللى بيكسب منها الاقتصاد القومى بعد منها فى علميات الفرز، وكله كانت أكثر بكثير من هذا.

أنا برجو بعد ما جه الأخ حسن، إن احنا هنقعد مع بعض ونزق شوية فى عملية التسويق الحالية، إنما برجو إعادة النظر فى التسويق الجاى إن احنا ننظر له نظرة متفتحة أكثر، وزى مايقول: اللى هو إشكال أنا بجمع أنا بعامل ٢,٤ مليون حائز بعامل ٢,٤ مليون مديونية مايبسدوش فى القمح حاجة؛ يعنى كل تسديدات القمح اللى جت السنة دى مبلغ بسيط جدا اللى دخل، دلوقتى أنا أقدر أجيب الرقم إنما يعنى ١,٢ مليون أظن أردب اللى دخل من القمح.

فبالتالى جميع سلف القمح بتركز على القطن وجميع سلف البرسيم بتركز على القطن، لما باجى أحاسبه المبيدات بتركز على القطن، الغرامات داخلة على القطن، فلما يواجهه بهذا الحساب طبعا الفلاح مهما كان الحساب بيوضح من العملية!

سرى للغاية

أنا موافق على بناء المخازن وهندأ بيه هذا العام، موافق على إن التعاون يلعب دور اختياري يعنى بنقول للفلاح اتفضل آدى جمعيتك التعاونية ونظمت، ودا الأسلوب اللى هنتبعه فى التوريد؛ تحب تجيب الجمعية التعاونية آدى نظامها ماتحبش تجيب الجمعية التعاونية أدامك تببع لفلان لعلان.. هنا أهو دى تهدى لنا الموقف.

عبد الناصر: بالنسبة للموضوع ده جهزوا لنا المشروع كامل نتكلم فيه.
بالنسبة لموضوع الغرامات.. حد ليه رأى فى الموضوع ده؟

داوود: أنا رأى برضه إن احنا نسيب الغرامات لأن هم مش معترفين بيها.

مرزيان: هو فعلا الغرامات بتشكل أيضا عبء آخر، يعنى اللى عليه غرامات بيتحايل إن هو يهرب من عمليات التوريد علشان مايستقطعش منه؛ لأنه بيبص يلقى الاستمارة جباله لو ورد بيبقى مش هيقبض ولا مليم، فبيضطر إنه يتحايل بأى وسيلة يفلت من هذه الغرامات وغرامة ضخمة لا تتناسب معه. وبعدين السنة دى بالنسبة للرز رفع الغرامة مأمون الجانب، الرز موجود فى الأرياف النهارده بـ ٥ صاغ الكيلو بيتباع رغم إن التسعيرة الجديدة ٦ صاغ من قبلها، وبـ ٢٧ جنيه الضريبة. موجود فى السوق النهارده يعنى أقل من التسعيرة، فـ ١٠٠٪ ناس من مصلحتها يعنى هم بيلحوا النهارده لفتح الشون لاستلام الرز ومش عاوزين يستنوا لأول نوفمبر؛ لأنه متلفهين على إنه يسلموا بسعر أفضل من المطروح أمامهم فى السوق، فرفع الغرامة هيعمل حافز كبير لتوريد أكبر ويعمل راحة نفسية كبيرة.

زكى: موضوع غرامات سهل، لأن احنا مثلا الفوايد بنكسب ونخسر فيها لكن الغرامة دى عقوبة على الفلاح، كوننا نشيلها مافيش حد خسران اقتصاديا بالعكس إحنا قلنا: إن نشيل الغرامات علشان نشجعه يورد، وقلنا: حتى حافز إن هنشيلها على كل من يورد.. فدى مافياش حاجة يعنى.

عبد الناصر: إنتو تقعدوا تعملوا العملية كلها، إنت عايز تستثنى الرز؟

سرى للغاية

مرعى: والله كان بدى تطلع من مجلس الوزراء، يعنى يبقى شكلها أحسن بدل ما بتطلع من لجنة يبقى قرار مجلس الوزراء.

عبد الناصر: لا بتحصل غرامات ولا ضرائب ولا حاجة! (ضحك) أتاريه قاعد ساكت! (ضحك)

أصوات: (ضحك)

مرعى: علشان أطمئنك أكثر عن الموقف، يعنى إنه عملية نظرية اللي احنا بنتناقش فيها.. متأخرات القمح ٢,١٢٠ مليون جنيه تقريبا اللي احنا حصلناه ١١٧ ألف جنيه. متأخرات الرز ٢,٥٨٦ مليون ده من ٦٥، ٦٦، ٦٧ محصل ٢٣١ ألف جنيه، العدس متأخراته ٢٠ ألف جنيه اللي حصلناه ٥ آلاف جنيه.

عبد الناصر: هو الحقيقة كل ما نقل القيود والخطوات فى المراحل الدنيا تمشى.

مرعى: آه.. بيرىحنى، وبعدين فى الحسابات بيرىحنى معاملتى مع الفلاح بيرىحنى، وبعدين يافندم أنا بدى أقول حاجة يعنى لوزير التموين: إنه الأسلوب بتاعنا لما انخفض سعر الفول هذا العام بناء على المحصول الكبير بتاع الفول، جه وزير التموين مباشرة بمنطق معقول جدا، قال: خلاص أنا ما بشتريش مش لازمنى لأن احنا محددين السعر ٨ جنيه أنا مش لازمنى الفول كويس، وأنا كوزير تموين أتدخل عندما تنقص السلع. وجينا عرضنا هذا الموضوع واتفقنا فى اللجنة الاقتصادية، اتناقشنا فيه قلنا: ما فيش داعى إن الدولة تتكلف يعنى إنها تخسر فلوس فى العملية والمحصول كويس. طب سيبنا محصول الفول، لما جه الدرة محصول السنة دى محصول وفير وموجود وسعره نزل، الناس بتنادى ياوزارة التموين اتفضلوا خدوه.. بيقول لى برضه بالمنطق المعقول: طب آخذ ليه ب ٤؟ ما هو موجود نسيبه فى التعامل الطبيعى.

طيب إذا كان أنا باسير بهذا النظام إن وقت السلعة ما بتقل سعرها فى السوق مبتدخلش كدولة، يبقى إذا برضه أتحمّل إذا أنا آجى فى بعض المحاصيل الحساسة اللي بتحتاج مزارع معين زى العدس وزى السمسم، أنا مش مستعجل فى السمسم لأن احنا بنلم السمسم دلوقتى مش هنعلن حاجة عنه لحد مانلم السمسم اللي موجود.

سرى للغاية

إنما المحاصيل الخاصة، الكتان ما لم يكون مزارع الكتان متعود على زراعته أنا مقدرش أخليه يزرع لازم أنا أريحه. ومع ذلك أنا مع السيد وزير الصناعة اجتمعنا أول إمبارح وريحنا موضوع الكتان، وماتعرضش للسعر بينما السعر من الناحية الصناعية مايجذبش، إنما قال: لأ.. نسيبه لأنه ماتقدرش نغير.

ومع ذلك أنا برضه بنادى بالنسبة للعدس، يعنى إسمح لى سيادتك مش ضرورى يعلن النهارده بقعد مع وزير التموين. إنما أنا مازلت أقول: إن برضه العدس أسيبه، وبعدين فلاح قنا وسوهاج مستواه تعبان يافندم. وبعدين قنا، أنا داخل له باعلمه طريقة جديدة بيتكلف فيها أكثر، وبعدين بقول له: عليك حيازة أردب ونص سعر ١٥، فعلا إنتو بتقولوا: سعر ٢٠ جنيه هو مش راضى لما تقول له سعر ٢٥ جنيه مش هيرضى، إنما لما تقوله سيبه يبيعه هيبيعه بـ ١٤ جنيه هو بينه وبين نفسه هيبقى راضى.

وأنا مش متخوف الخوف الكبير زى الأخ مرزيان إلا فى العام اللى جاى بس، لأنه الدرة مثلا كان طلب منى فى الدرة السنة اللى فاتت إنى أعمل حيازة على الدرة، وأنا قلت: لايمكن أوافق إنى أعمل حيازة على الدرة وطلب هذا رسمى منى وأنا قلت: أنا هتحمل المسؤولية ومافرضش حيازة على الدرة. يعنى سيادتك لو كنا خدنا حيازة للدرة السنة اللى فاتت وبقي فى إيدنا شوية درة كان السوق نقص كذا أردب، وكنا ابتدينا أمين الشونة ياخذ فلوس وتبتدى السوق السودا تيجى، إحنا سيبناه للتعامل الطبيعى طول الموسم. السنة اللى فاتت الدرة مازادش عن ٨٥ قرش، كمية الدرة المستوردة الآن فى بنك التسليف بتسوس الناس مش عايزاه نزل الدرة الى ٢٥. أنا موافق إنى ماخشش مشتري فى الدرة يعنى أنا مبنازعش؛ لأن احنا لنا مصلحة إن سعر الدرة يتته فى سعر معقول أو لو ارتفع عن ٢٥ يبقى فى حدود المعقول. موافق على إنه مادخلش فى الفول وموافق على إنه مايبخشش فى المحاصيل، لأن هيبقى برضه فى نفس الوقت فيه بعض المحاصيل الخاصة أسيبها وأعمل لها أى نوع وهى هتستقر على وضع معين.. دا بس اللى حبيت أقوله.

أنا بفضل إن ده لما ييجى من خلال قرار مجلس الوزراء يبقى له أثره على طول، يعنى بدل ما يطلع قرار من لجنة من وزير مختص فليه أثره ولو وافق عليه المجلس أنا أقدر أحط الصيغة اللى بيطلع بيها، لأنه بييرحنى.. بييرح فى التحصيل وبييرحنى فى المعاملة، بييرح فى الناس، بييرحنى فى زراعة العدس.

عبد الناصر: .. يبقى يعلنه السيد مرعى بقى.

سرى للغاية

مرعى: آه.. أعمل بيان بكره وأعلنه كقرار من مجلس الوزراء.

عبد الناصر: تقدر تقول برضه بحثنا السياسة الزراعية والمحاصيل يعنى.

أنا عندى برضه موضوع تانى قبل ما ندخل فى جدول أعمال اللى هو نقل مصنع تفحيم المازوت من السويس. واللى أنا فاهمه إن فيه خطورة فى تشغيله لأنه إذا أصيب وبعدين إن أجلا أو عاجلا يعنى هانشتبك مع العدو.. فأنا شايف إن احنا من دلوقتى ننقله.

صدقى: هو سيادتك كنت أمرت إن احنا نشوف موضوع نقل كل المعامل هناك، وإحنا عملنا خطة لهذا مش بس بالنسبة لمعمل التفحيم ومعامل التكرير وكله.

عبد الناصر: هو فيه وحدة تكرير اللى بتدى التفحيم، دى أيضا ممكن تنتقل يعنى تاخذ أسبقية.

صدقى: بحثنا ووجدنا إن نقل معمل التفحيم هياخد من ٣ الى ٤ سنين..

عبد الناصر: النقل!؟

صدقى: أيوه يافندم.. وبعدين هو الخطورة إنه يتضرب وهو شغال أما لو اتضرب وهو مش شغال.. يعنى العمليات اللى فاتت الخسارة فى معملين التكرير كانت ١٠ مليون جنية، فى معمل التفحيم رغم إنه هو أضخم منهم بكثير كانت ٣٠٠ ألف جنية، لأنه مكانش شغال. فالاقترح اللى اقترحناه إننا مانشغلش مشروع التفحيم لكن ننقل منه الأجزاء السليمة، لأنه حتى لو انضرب الدمار هيبقى قليل جدا.

بنقترح إن بالنسبة لمعامل التكرير إنه مرحليا بنستمر فى تشغيلها، لأن العائد من تشغيلها مجزى جدا. هو طبعا وضعنا خطة وبعثنا لسيادتك والى السيد وزير الحربية والسيد وزير الاقتصاد والسيد وزير الخزانة والسيد وزير التخطيط، على أساس إن احنا تدريجيا بننقل الطاقة اللى موجودة فى السويس الى مسطرد والتكرير فى إسكندرية، بحيث إن احنا مانبقاش عطلايين خالص بالنسبة للمنتجات؛ لأنه لو طاقة المعامل نقل عن حد معين هنضطر نستورد منتجات، فرق تمن المنتجات من الخامة اللى دخلت فيها فرق كبير جدا؛ يعنى تمن الخامة مثلا بتعادل أقل من نصف قيمة المنتجات فيبقى معناها إن العبء الاقتصادى كبير جدا.

سرى للغاية

فعملنا خطة متكاملة، والحقيقة السيد وزير الحربية درسوها فى القوات المسلحة وموافقين عليها، والسيد وزير الخزانة أيضا وافق على إنه الاعتماد الإضافى اللازم - اللى هو حوالى ٢,١ مليون - يدبر كاعتماد إضافى. السيد وزير الاقتصاد كان مش موجود إنما إذا سيادتكم وافقت بنبدأ تنفيذ الخطة كلها؛ لأنها بتتضمن الى جانب موضوع التفحيم اللى سيادتكم أمرت بيه إنه نقل منطقة السويس كلها تدريجيا.

عبد الناصر: وده هياخذ أد إيه؟

صدقى: فيه حاجات هتاخذ عشر شهور فيه حاجات هتاخذ ١٢ شهر وفيه حاجات هتمتد على مدى ٣ سنين، إنما لايد نبدأ من الآن.

عبد الناصر: هو اللى أنا فاهمه دلوقتى إنهم بيحشدوا بيكدسوا الصواريخ قصاد السويس والإسماعيلية!

فوزى: أيوه يافندم.

صدقى: هو لو سمحت لى سيادتكم.. هو الإسماعيلية مشروع مواد الصباغة كان جزئين جزء ركب خلاص والجزء التانى كان ركب ٧٪ من معداته والباقى فى الصناديق، أنا ماستيتيش وقلت كل الصناديق تنتقل من الإسماعيلية وهنجيبها القاهرة الى أن نختار موقع. بالنسبة للموضوع التانى اللى أنا عايز برضه أتكلم فيه، مشروع السماد اللى هو مصنع السماد فى السويس، وده الحقيقة مانقدرش نوقفه لأنه يعنى إنتاجه بيشكل قيمة كبيرة جدا سنويا ومهواش تحت الضرب يعنى زى معامل التكرير.

عبد الناصر: لا.. بنتكلم فى المدى.

صدقى: فأنا أقترح إنه يستمر تشغيله.

فيه موضوع تانى هو المصنع الجديد اللى بيركب، هل هنستمر فى التركيب ولا لا نستمر؟

عبد الناصر: السماد؟

سرى للغاية

صدقى: السماد، برضه يعنى إحنا كان اقتراحنا يافندم بالنسبة للسماد إن احنا نستمر فى التشغيل.

عبد الناصر: وافرض إنه اتضرب؟

صدقى: ده مش كبير؛ لأنه حتى المرة اللي فاتت إحنا تغلبنا عن هذا وعملنا وصلات داخلية فيبقى احتمال انفجار كبير مافيش.

عبد الناصر: لكن هو التفحيم إذا انفجر بيأثر على البلد كلها.

زكى: مش لو البترول اتضرب مش هنقدر تشغل السماد علشان الغاز.

صدقى: لأ.. ما هو إحنا عملنا وحدة جوه مصنع السماد تجيب الغاز لنفسها.

زكى: هتشغله ١٠٠٪؟

صدقى: آه.. ١٠٠٪.

هو يافندم بس بخصوص مصنع السماد اللي هيتركب، مافيش داعى أبدا إذا كانت المنطقة فعلا مهددة ودا مصنع هيجرى تركيبه، وأنا هفك المصانع اللي متركبة فعلا مافيش ما يدعو من..

عبد الناصر: هنقدر نركبه فى حطة تانية؟

صدقى: هو أعمال التجهيزات كلها تمت يعنى فيه استثمار ضخم كذا مليون جنيه، ممكن الآلات طبعاً ننقلها لكن هنخسر فيها بقى أولاً: الوقت لأنك هتبتدى تعمل التجهيزات من أول وجديد. ثانياً التكاليف..

سرى للغاية

عبد الناصر: آه.. لو ممكن بعد كدا هنزود فى السماد نبقى نعمل مصنع جديد لما نخلص يعنى.

صدقى: يعنى أخلى التجهيزات تنفع بعدين.

عبد الناصر: ينفع لمصنع جديد تانى، إحنا لازم هنتوسع فى السماد باستمرار ده اللى أنا متصوره، لكن هو اللى أنا متصوره إن السويس والإسمايلية يعنى هتتطرق فى يوم ما.. ده اللى أنا متصوره. وأنا بالذات من أولها رامى طوبة السويس ومعتبرها فاقد، حتى يعنى يوم ما إنضريت السويس أنا كنت بقول: أنا معتبرها من الأول يعنى حاجة هتتضرب.. هتتضرب، وبعدين العملية مهياش هنكون عملية سهلة العملية الحقيقة باين من تدخل أمريكا فيها إنها هنكون عملية عويصة جدا. وبعدين هى حتى لو مشيوا بعدوا من شرق القتال، برضه طيارات الفانتوم بتشيل ٦ طن أظن ولّا حاجة كده وباين إن أمريكا داخلة فى الموضوع.

ف. فوزى: هو المشروع بتاع الدكتور عزيز يافندم مقلل المفاجأة فى عدم وجود أضرار كثيرة، يعنى لما اتفاجئنا يومئها وخسرنا مبالغ كبيرة نتيجة تشغيل المصانع. والمشروع بتاعه اقتصادى باين مافيش مفاجأة كبيرة هنتم، وبالتالي مافيش خسائر كبيرة لأنه حقق حاجتين.. هو بطل التفحيم مافيش خسارة هتيجى، وناقل الحاجات العزيزة بتاعته مشغل بيها حاجات أخرى فى مسطرد وإسكندرية وكتر التخزين الشعبى، بس فيها ٣ مليون جنيه.

صدقى: هى فيها ٢,٦٠٠ مليون الحقيقة و٣ مليون نقد حر، نتيجة لإن احنا السنة دى مادام مش هنشغل المعامل هنضطر نستورد منتجات بدلا من اللى احنا بننتجه، الفرق يطلع ٣ مليون جنيه نقد أجنبى.

ف. فوزى: هما موضوعين اتنين بس من إعداد خطة الدولة للحرب.. تأمين الأفراد يخص السيد وزير الداخلية، وموضوع البترول يخصه الدكتور عزيز صدقى.

عبد الناصر: طبعا يدخل هنا موضوع أيضا تخزين البترول.

سرى للغاية

صدقى: ما هو ده داخل فى المشروع يافندم، إحنا مشينا كل اللى طلبته منا من القوات المسلحة بعمل مخازن بأحجام صغيرة ومنتوزعة على الجمهورية كلها.

عبد الناصر: يعنى الحقيقة لازم نمشى فى هذا الموضوع يعنى نبتدى فى العملية على طول.

ف. فوزى: المذكرة مقدمها النهارده للمجلس.

عبد الناصر: هى دى؟

ف. فوزى: واحدة خاصة بالبتروال والتانية خاصة بتأمين الأفراد.

عبد الناصر: الموضوع التانى الحقيقة: موضوع الدفاع المدنى، يبقى إذا ابتديت العملية وقد تبتدى من غير إحنا مانهجم قد بيتدوها اليهود، باين برضه إذا حسوا إنهم فى مركز قوى ممكن يضربونا. فعلمية الدفاع المدنى الحقيقة لازم نمشى فيها مش بس بالنسبة للسويس والإسماعيلية بالنسبة لكل المدن، لأنه ممكن ييجى يضرب أسيوط يضرب أسوان. والحقيقة نقدر نمشى فى العملية تصاعدية، يعنى نبتدى بكلام فى المحافظات وبعدين نبتدى فى التنفيذ.

وإحنا لما ناخذ الموضوع بتاع فيتنام مثل، إزاي ابتدوا من مافيش ووصلوا الى إن كل واحد ليه حفرة فى دقيقة ونص بينزل فى الحفرة؛ يعنى الناس اللى فى هانوى بياخدوا إنذار دقيقة ونص، لكن فى الدقيقة ونص كل واحد يكون نزل فى الحفرة.

إذا كنا هندخل فى حرب لن تكون قصيرة الأمد هتكون حرب طويلة، وعلى هذا لازم نكون معرضين إن إسكندرية بتتضرب القاهرة بتتضرب العمليات الأخرى بتتضرب، وإحنا أيضا يعنى أيضا لازم نكون مستعدين نضرب يعنى موضوع الـ retaliation.

لكن هو موضوع حل سلمى مافيش حل سلمى، وهو زى أنا ماقلت فى اللجنة المركزية: فيه كلام لإشكول والحاجات اللى مابتعلنش باين إنهم مش عايزين يسيبوا حاجة، وباين أيضا كلام ببيان إنه موجه لينا بالذات من موسى ديان ويمكن بعتره هو موجه لى أنا شخصيا إنه مش هيسيبيوا سيئا! يعنى هم بيحبوا يغيظونا طبعا وطبعا بيغيظونا، يعنى يمكن فوزى مايبتهغازش لكن أنا بتهغاز! (ضحك)

سرى للغاية

فالحقيقة كمان لازم نجهز نفسنا للحرب أكثر مما نحن فيه، لأن احنا الحرب قائمة لا محالة. ببيجي فى هذا بقى من الأخ حسن عباس بيدى الروس شوية قطن زيادة يعنى إنت السنة دى واكل منهم ٦٠ ألف مش كدا؟

زكى: المشكلة اللي أنا بواجهها إن معديش محصول.

عبد الناصر: لا.. لا.. مانت بتدى الغرب، معلىش.

زكى: ده أنا دلوقتى لأول مرة عمرنا مانقول إن ممنوع البيع، أنا بقول: أنا عندى طلبات، ده وزير ألمانيا هو لهم ٧٨ ألف طن.

عبد الناصر: هو الروس مش لهم ٦٠ ألف؟

زكى: لهم.

عبد الناصر: طيب دلوقتى إحنا الحقيقة بناخد منهم حاجات، وبعدين مستنيين منهم يعنى حاجات كثير.

زكى: ده عمر إحنا ما هنقدر نصدر أكثر من ٦٥ ألف طن، أنا مديله ٥٠ ألف طن ومش هاقدر بس هو الحقيقة بيزودها أوى، يعنى سهلت له وجالى مرتين وطلع مستريح والنهارده بيقول لى: أنا عاوز كمان! قلت له: طول بالك لديسمبر لأن أنا ادبتك شحن لـ ٣ أشهر الجايين ولما أشوف المحصول هيحصل إيه. وأنا عندى عجز السنة اللي فاتت نص مليون قنطار، وبعدين الاشكال التانى إن احنا مضطرين برضه علشان النقد الحر باضطر أبيع جزء.

عبد الناصر: ماهو اللي أنا يعنى باخده منه دلوقتى إذا مكانش بيدينى كنت هاقول لك: هاتلى الحر علشان أشتري به.

سرى للغاية

زكى: أنا بيص للحر مش بس من حيث الفلوس، المصنع اللي بيشتغل بالمصرى لو أنا ماديتوش النهارده هيروح للسودانى مايرجعليش.. مش سهل أبدا. أنا بقول: على الأقل يشتغل يعنى اللي بيشتغل ١٠ آلاف بالة باديله ٨ آلاف مش فارق، لكن أديله ٤ آلاف ماينفعش! وفيه فعلا بعض المصانع اتحولت لكن إحنا بنحسبها بالمصرى، لما مصنع صغير بقول: مايهمش مصنع كبير بحاول أديله قدر ما..

عبد الناصر: يعنى على كل حال هو المطلوب إن احنا نريحهم.

زكى: طبعا.. طبعا.

عبد الناصر: يعنى مايبانش إن احنا مانعين عنهم وبندى، وبعدين هم مايباخدوش منا فلوس الناس، وبعدين أنا دلوقتى مستنى منهم الحقيقة فى الفترة دى بالذات من هنا لآخر السنة كميات كبيرة جدا من الطلبات المفروض إنهم..

فوزى: وصلوا أول إمبارح.

عبد الناصر: وصلوا المدفعية؟

ف. فوزى: علشان كده هو مش عاوز يرجع المراكب فاضية.

عبد الناصر: وصل حاجة غير المدفعية؟

ف. فوزى: لا.. هى المدفعية بس وذخيرتها.

صدقى: هو كان جالى مستشار تجارى لأن الأخ حسن مكانش موجود، ورجانى حاجتين.. إنى أترجاه إنه يزود حصة القطن، والتانى سرعة التسليم لأنه كان فيه يظهر تأخير فى بداية التسليم للقطن.

سرى للغاية

النقطة الثانية: كان السيد وزير الحربية، القوات المسلحة طلبت إن احنا نزود كمية الـ turbine علشان سلاح الطيران وإحنا اتصلنا بيهم.. الوفد اللي بعتهاه موسكو يتفاوض. هم بيشتروا top line بعملة صعبة، فقالوا: يعنى على الرغم من هذا إحنا مستعدين إن احنا نجيبه لكم على إن إنتو تدفعوا لنا عملة صعبة. طبعا مش هنقدر ندفع عملة صعبة، فطلبوا إن احنا نديهم نفثة اللي هي إحنا بنقدر نبيعها بالعملة الصعبة، وأنا وافقت على هذا لأن لو أنا ماخدتش منهم فأنا هاشترى بعملة صعبة، فقلت: إن احنا قصاد وقود الطائرات هنديهم بداله نفته.

بالنسبة للغزل طلبوا أيضا إن احنا نزود حصتهم فى الغزل، إحنا مرتبطين مع وزارة الاقتصاد بتوزيع النقد الأجنبى للتصدير الحر، لو سيادتكم رأيت إن احنا أمام الموقف الحالى إن احنا الحصيلة تبقى هي هي ولكن يحصل سويتش من هنا لهنأ.

عبد الناصر: هو أنا اللي طالبه بالذات إن احنا نريح الاتحاد السوفيتى فى الفترة الجاية دى لغاية برضه أوائل السنة الجاية؛ لأن يعنى هم الحقيقة اللي عملوه معنا لا يقدر بتمن يعنى برضه هم دلوقتى الطيارة اللي مديينها لنا تضرب الفانتوم.

زكى: هو النهارده ما فيش أحسن منه حتى من الناحية التجارية.

عبد الناصر: وبعدين لما روحت أنا، الكلام اللي إنت مديهولى رغم إنك يعنى كنت مغالى فى الطلبات اللي إنت كنت طالبها، لما راح رياض وانكلم معاهم وافقوا، فالناس الحقيقة كونهم مثلا يعنى موضوع الطيارة لوحده بناء على إلحاحنا إدونا طيارة طويلة المدى وتسليحها كبير.. تسليحها أزيد من اللي عندنا، بتغير؛ فلما نضايقهم أصله ده جهاز متشابك هناك، هيعقدوا لفوزى.

زكى: آه.. طبعا.

ف. فوزى: والله واثق إن موضوع الـ turbine ده حساس لأن أنا مجموع الـ turbine اللي عندى بتاع ٧ أيام بس.

سرى للغاية

عبد الناصر: طب ما لازم تخزنه.

ف. فوزى: الكمية حساسة، وأنا بعت أكتب لجريتشكو وأدخله فى الموضوع علشان يغطى التكديس الزائد من الـ turbine، ٧ أيام حساسة بالنسبة لى.

عبد الناصر: هو ده وقود الطيارات؟

صدقى: أيوه.. وبعدين حتى مانقدرش نجيبه بالعملة الصعبة لأنه هو نوع الوقود بتاعهم للطيران الروسى مختلف. والله يافندم لو سمحت سيادتك.. يعنى لفنة من إنه ولو كمية بسيطة قطن زيادة عن اللى تمسكوا بيه.

عبد الناصر: هو اتكلنا لما سافرنا هم ماكلمونيش.. مراد غالب هو اللى كلمنى.

صدقى: يعنى كمية غزل زيادة وكمية قطن زيادة.

زكى: إحنا إدينالهم غزل وإدينالهم رز وقطن، بس هو طبعا عاوز كمية كبيرة لأن مش قادر يوفى هذا.

صدقى: بس مانقولش: لأ خالص يعنى.

زكى: لا.. مابقولش لأ.. ده أنا وافقت له على قطاع ديسمبر، بس هو جاي دلوقتى عايز بتاع يناير اللى هو فى الناحية الحسابية هيتخزن يعنى.

عبد الناصر: هم السنة عندهم مختلفة عن السنة بتاعتنا.

زكى: فالإشكال جى من هذا، وهو رضى وسكت لكن معرفش إيه اللى خلاه اليومين دول جى يتكلم على بتاع يناير دلوقتى، مع إن احنا اتفقنا لغاية ديسمبر وأنا قلت بعد ديسمبر نشوف إيه اللى نقدر يعنى.

سرى للغاية

عبد الناصر: لأ.. هم الناس طبعاً بيخططوا من قبلها بمدة، لازم من دلوقتى عايز يعرف يناير لأن إذا ماكنتش هتديله عاوز يطلب من بلد تانية، يعنى قطعاً هو ديسمبر قرب ويناير قرب ولازم يعنى ده السبب لأنه إذا ماخدش عندنا بيروح فى بلد تانية بيطلب.

جمعة: سيادتكم هتعود تانى لموضوع الدفاع المدنى لأن فيه مذكرة موزعة من السيد وزير الحربية.

عبد الناصر: هنا عندنا ولا إيه؟

جمعة: أيوه يافندم.

عبد الناصر: عندى بشأن التعليم العام والخاص والعالى أنا معنديش.. على العموم ده بنحطه فى حسابنا الحقيقة وبعدين نبقى نشوف المذكرة.

جمعة: عايزين فلوس يافندم.. فيه فلوس يعنى.

عبد الناصر: ماهو طبعاً يعنى العملية الحقيقة لازم فلوس هننقص من حاجة وندفع حاجة، عايز فلوس أد إيه يعنى؟

جمعة: هو التكاليف الحقيقة متوقفة على عدة اعتبارات، هو بالنسبة للأقنعة الواقية كمان الكمادات ده مبدأ الدولة لازم هتقره هل إحنا هنشتري كمادات ولا لأ؟ لأن تكلفتها كبيرة.

عبد الناصر: لمين؟

جمعة: هنوفر على الأقل للعاملين فى الدفاع المدنى والناس الللى ساكنين فى منطقة القتال أو الللى ضرورى بيكونوا موجودين فى وقت الغارة، وفيه مصنع بيشتغل فيه الأخ البشرى إنتاجه لسه فى بدايته لكن عايز يرتبط مع الدولة علشان يسير الإنتاج بخصوصه.

سرى للغاية

عبد الناصر: هل إحنا عندنا كمادات لكل القوات المسلحة؟

ف. فوزى: أنا مرتب نفسى يافندم والاحتياجات الباقية نازلة للتعاقد مع وزير الإنتاج الحربى.

عبد الناصر: عندك يعنى؟

ف. فوزى: آه يافندم الفردية والوحدات فيه كمامة وفيه أطقم.

جمعة: النقطة الثانية يافندم.. هو فى المذكرة السيد وزير الحربية كنا مقدمين له خطة وهو وافق على..

عبد الناصر: أنا مش متصور هندی كمادات للمدنيين!

جمعة: مش كلهم يافندم، لكن بعض الناس أعمالهم لازم نوفر لهم اللي هم كل الناس اللي بيعملوا فى قطاع الدفاع المدنى. المذكرة الموزعة هو موافق على ١,٧ مليون جنيه.

عبد الناصر: هل إحنا عندنا احتياطي غاز إنتاج؟ أنا سمعت إنكم انتجتوا نوع جديد من الغاز.

فوزى: لسه فى مرحلة بحوث موصلناش لمرحلة الإنتاج.

أحمد: هم سافروا بره علشان يجيبوا المواد والترتيب يعنى التجهيز عدة أيام.

عبد الناصر: يعنى متهيالى لازم نكون جاهزين برضه باحتياطي لأن إذا استخدموا هم لازم نستخدم إحنا.

فوزى: شغلانة استراتيجية وسرية عالية أوى، لازم نشترى ٥٠ مللى جرام ونجرب فيهم الأول، شغلانة كبيرة مش صغيرة.

سرى للغاية

عبد الناصر: لكن الـ infogn إنتو أنتجتوا الـ infogn.

ف. فوزى: أيوه موجود والبيولوجى كمان.

عبد الناصر: هل وصلوا فى نتائج؟ هم برضه بيشتغلوا بيولوجى.

ف. فوزى: إحنا جرينا ميدانيا.

أحمد: هم بيوردوا لأمريكا.

عبد الناصر: مين؟

أحمد: اسرائيل بتصدر لأمريكا المواد دى.

عبد الناصر: المواد إيه الـ chemicals؟

أحمد: بتاعة الأعصاب.

عبد الناصر: جهاز الأعصاب ده يموت ولا ده يفقد الأعصاب بس؟

أحمد: مايموتش بس يعمل شلل.

عبد الناصر: فيه كلام يموت وفيه كلام يشل، على العموم يعنى أنا بقول: بنعمل الدفاع المدنى مع أقل

تكاليف ممكنة، يعنى أنا متصور الدفاع المدنى هو إيه؟ ياتجهيز بدروم يا حفر خندق ولازم

الناس تاخذ لما تيجى غارة بينزل تحت زى أيام الحرب العالمية الثانية.

جمعة: ما إحنا عاملين كدا يافندم، يعنى إحنا بدرومات وجراجات والمدارس كل دى مجهزة لهذا.

الأعمال الحقيقية بالنسبة للحفر، إحنا مديين واجب للمحافظات والاتحاد الاشتراكى إنهم

يعملوا حفرة، فى كثير من أراضينا إحنا هنا الحفر فيها صعب زى إسكندرية.. مثلا

سرى للغاية

إسكندرية علشان سيادتكم تعمل حفر كل الأرض بتاعتها صلبة جدا، مناطق القنال كلها ماينفعش فيها الحفر لأن المياه بتتنشع على طول؛ فدى فى بعض البلاد إحنا محتاجين لابد إن احنا نعمل حاجات يالما مغطاه يالما بتخش شركات المقاولات هي اللي بتجهزها أكثر.

ففى المذكرة إحنا كنا مقدرين مبلغ كبير ولكن اتجهنا بعد كده إن احنا نقلل، وكنا عايزين مليون جنيه من أجل توفير الخنادق للأراضى اللي هي لا يصلح فيها الحفر أو تكمل لنا عملية الحفر، زائد ١,٧ مليون جنيه اللي هي خاصة باستكمال أجهزة الإنذار بعض قطع غيار والإنقاذ ومعدات الاطفاء. إحنا اشترينا السنة اللي فاتت معدات كثيرة الحقيقة من ناحية الإطفاء، ولكن برضه حسب الدراسة مع وزارة الحربية وجدوا إن لابد من توفير معدات تساوى ١,٧ مليون جنيه، فوزارة الحربية وافقت على ١,٧ مليون جنيه وتركتم اعتماد المليون جنيه بتاعة الخنادق.

الحقيقة هي الحركة كلها فى البلد النهارده سياسيا بيبصوا للخنادق أكثر مايبصوا لعملية الإطفاء والإنقاذ، فلو سمحت سيادتكم لو الاعتماد بيتم على أساس ٢,٧ مليون جنيه، إحنا الداخلية بتاخذ ١,٧ مليون وبيروح مليون جنيه لوزارة الإسكان بتتصرف منه حسب خطة الدفاع المدنى مع استخدامه فى أقل ما يمكن بالنسبة للأراضى الغير صالحة لعمليات الحفر.

عبد الناصر: يعنى هو إحنا الحقيقة لازم ندى هنا أسبقيات مدن القنال ويعتبر إن ده ماشى فيه أسبقية أولى زائد بورسعيد، وبعدها القاهرة وإسكندرية وأسوان يعنى بالتالى.

صوت: وداخل شبرا الخيمة وداخل الجيزة كمدينة يعنى ده الأسبقية.

عبد الناصر: وبعدين العمليات الباقية المحافظات بتقدر تقوم بيها بجهد ذاتى من غير ماندفع فلوس.. المحافظين ياخدوا واجبات ويقوموا بيها.

جمعة: لا.. عايزين نكمل برضه بالإضافة الى هذا، يعنى منطقة القنال صعبة جدا يافندم سيادتكم إنك توفر الملاجئ فيها كلها بطريقة الحفر العادية يعنى لابد عايزة مساعدات مالية فيها، كذلك إسكندرية.

سرى للغاية

عبد الناصر: طب ما احنا قلنا على منطقة القنال هنهجر.

جمعة: بس يعنى فيه ناس هتبقى موجودة.

عبد الناصر: عدد قليل يعنى.

جمعة: هيبقى فيه ناس موجودة لابد إن احنا نوفر لها، القاهرة هنا فيه بعض المناطق هنضطر خصوصا فى بعض المناطق اللي مابيكونش سهل الحفر فيها، بنضطر نوفر خندق أو ملجأ كبير للجماهير اللي موجودة فيها يساعد مع المساعدات الأخرى، فأنا بقول: مليون جنيه ده أقل ما يمكن بس هيرفع معنويات الناس وفى الوقت نفسه يبقى ببساعد فى كثير من الأراضى.

عبد الناصر: عايز مليون جنيه بس؟

جمعة: ده مليون جنيه للإسكان للخنادق زائد ١,٧ مليون جنيه ده اللي طالبه.

عبد الناصر: يعنى دلوقتى مثلا حتة زى القلعة زى الغورية الفحامين تعمل فيها إيه؟ يعنى هى دى الحقيقة قنبلة هناك بتضيق الحى كله!

جمعة: هو هنا سيادتكم عارف المساكن دى مافيش منها فائدة، هو إحنا اعتمادنا هنا يإما على المدارس أساسا إن هم يروحوا فيها، ودى الخطة اللي عاملها محافظ القاهرة ده الأساس، زائد إن احنا لابد أن نوجد بعض الملاجئ لأن البيوت مافيش منها فائدة.. لا بدرونات ولا أى حاجة!

عبد الناصر: طب هو هنا هتدى المدارس، هنا القاهرة هتاخذ إنذار أد إيه يا فوزى؟

ف. فوزى: مافيش حاجة يافندم.

سرى للغاية

عبد الناصر: يعنى اللى أنا متصوره إن الغارة هتقع على القاهرة قبل ما تضرب صفارة الإنذار!

ف. فوزى: مضبوط.

عبد الناصر: زى ما حصل يوم..

جمعة: فى مثل هذه المناطق إحنا لازم نتقبل خسائر لأن البيوت أى حاجة من هزة القنبلة بس البيوت دى هتقع.

عبد الناصر: النقطة الحقيقة الثانية - أصل الواحد طول ماهو قاعد بيفكر فى الموضوع - إن احنا لازم نكثف الدفاع الجوى عن القاهرة وإسكندرية بالذات بالنسبة للطيران الواطى. وعندنا مثل فى هذا السويس، حاولوا يضربوها بالطائرات مقدروش يضربوها أبدا لكن لما جت الطائرات ورمت نزل فى البحر فى الأول ليه؟ لأن فيه الدفاع الجوى عن السويس كويس وده الحقيقة يمكن برضه يكلفنا.

وبعدين أنا بقول: ليه مانشتري من كوريا مثلا إذا كان الكوريين مستعدين ببيعوه لنا - ال ١٤,٥ - إن شاء الله بعملة حرة.

ف. فوزى: هقابلة وأمتص فوق الهدية اللى هو قالها، لما أشوفه هو جاى اتفقت مع الأخ محسن وبعدين إذا كان ناوى يبيع ما فيش ما يمنع.

عبد الناصر: لازم يبيع أدام بينتج مش هو بينتج؟

ف. فوزى: أيوه يافندم.

عبد الناصر: وبعدين إحنا اتكلمنا فى الإنتاج معملناش!

البشرى: أنا كنت إمبارح بكلم الأخ فوزى. فيما يختص ب licence بتاع ال ١٤,٥ والأخ فوزى طبعا عارف الموضوع أكثر منى. أنا بقول: عاوز يايما ناخده من كوريا يايما ناخده من روسيا يعنى حد يروح كده ويجيب ال licence ونحاول إن احنا ننتجه على طول.

سرى للغاية

ف. فوزى: وعدنى إن هو يجيب لى رد أول إمبراح.. جريتشكو.

عبد الناصر: لأن يعنى اللى باين فى فينتام الحقيقة بيشتغلوا العملية كلها بالمدافع بتاعة الطيران الواطى، وضاربين ٣٣٠٠ طائرة فى فينتام الشمالية زائد ٣ آلاف طائرة ثانية فى لاوس وفينتام الجنوبية، يعنى هو الحقيقة الأمريكان خسرانين ٦ آلاف وحوالى ٢٠٠ أو ٣٠٠ طائرة، فى الأول مكانش فيه حاجة يعنى.

فإحنا الحقيقة لما اليهود ياخدوا خمسين طائرة فى أربعين طائرة يعنى، إذا مثلا قاموا بغارات علينا وقعنا لهم فى اليوم ثلاث أربع خمس طيارات بالنسبة ليهم زى كأننا بنوقع لأمريكا ١٠٠ طائرة يعنى العملية هنا عملية نسبية، وهم لما وقع لهم الثلاث طيارات ولا الطيارتين بتوع السويس بطلوا يبجوا خالص!

فالحقيقة أصل العملية دى يعنى إن آجلا أو عاجلا أى مبلغ بنصرفه على أسلحة الدفاع الجوى الواطى والعالى، برضه إحنا عندنا بالنسبة للعالى بعتبره هيحيب تكاليف، وبابن الحقيقة من الفانتوم لأنه الخمسين فانتوم دول أنا بعتبرهم دفعة أولى لأن بعد جمعة هيقولوا إن احنا جتلنا طيارات من الاتحاد السوفيتى! وابتدوا النهارده - أنا شوفت فى البرقيات - بيقولوا إن الاتحاد السوفيتى ردا على الفانتوم هيدوا مصر ميج ٢٣ والسوخوى، وهيطلعوا يفضلوا يزودوا يزودوا يزودوا وبعد كدا يروحوا مديين ٥٠ طائرة، وبعدين الكلام اللى هم قائلينه: إن لن يمكن إنهم يسمحوا للعرب بالتفوق.. باين إنه واضح.

ف. فوزى: هم عايزين الفانتوم علشان يقدرنا يشغلوا السكاى هوك، السكاى هوك سيادتك عارف عامل ١١,٦٠٠ رطل بتاعة خمسة إلابر.

عبد الناصر: لكن بطيئة.

ف. فوزى: لكن بطيئة مش قادرين يستخدموها صحيح المدى طويل فعاوزين حماية لها، فمتوقع أنا إن الاتنين هيبجوا مع بعضهم ويطول أى غرض موجود فى الجمهورية. فحتى اصطياذ السكاى هوك أفضل لى لأن هو السلاح اللى هستخدم من ناحية التسليح، فإن شاء الله الموقف متغير لأن حاليا دلوقتى ٢٣ ضعف عما كنا عليه يوم ٥ يونيو.

سرى للغاية

عبد الناصر: فى إيه؟

ف. فوزى: بالنسبة للرشاش الخفيف اللى خدناه.

عبد الناصر: ٢٣؟

ف. فوزى: أيوه يافندم الأسبانى والهندى وشوية اللى خبطناهم من اليهود زائد الاتحاد السوفيتى، والحقيقة المصانع عملت لنا القاعدة فطلع المدفع رخيص. لكن لسه برضه الأهداف الحقيقية اللى عندنا وتكديس الشعب على النيل عاوز طاقة كبيرة من ناحية كثافة النيران، ومش متوزع الشعب ولا الأهداف الحيوية ولا التخطيط السابق بتاعنا موزع الأهداف أبدا!

البشرى: هو برضه الحقيقة من الموقف العام اللى بنستشفه من الأخ فوزى، إن الإحتمالات بتاعة إن الحرب الكيماوية إن اسرائيل دخلت فى هذا لو أستمر هتبقى مشكلة. إحنا دلوقتى مصنع الأقنعة الواقية إحنا تقريبا إبتدينا نخش دلوقتى فى عملية الإنشاء فيه، وتقريبا هنقدر لغاية يونيه هيكون حقق كمية فيما يختص بالقوات المسلحة وكمامات. عملنا مؤتمرات إحنا مع مجموعه من صفة الجيولوجيا وجمعنا معلومات قدر المستطاع، والحقيقة المركز العلمى للبحوث عملوا مجهود مشكور عليه أوى؛ إن المادة المنشطة بتاعتها توصل الى مادة صعبة المد فيها، وتوصل الى أن المادة الخاصة بتاعتها بتفوق المواد اللى بتيجي من بره من بعض الدول يعنى اللى بتشتغل فى الموضوع.

فعملنا تصميم لقناع شعبى فى مراحل النهائية، ويجوز إن احنا فى الفترة الجاية نقدر نطلع ٢٠٠ ألف.

عبد الناصر: أولاً: اللى أنا متصوره بالنسبة للأسلحة الكيماوية، مش ممكن بيحى يضرب الناس بالأسلحة الكيماوية لأنه هيسفيد من ده بإيه من الناحية الإستراتيجية؟ إذا ضرب هيضرب القوات المسلحة عشان يفتح ثغرة فى وسطها ويعمل لها نوع من إستغلال النجاح، لكن إفرض جه ضرب القاهرة بالأسلحة الكيماوية بيكسب إيه؟

البشرى: عدد كبير من الإصابات.

سرى للغاية

عبد الناصر: يعنى معنى هذا إنت عايز ٣٠ مليون أو ٣٢ مليون جهاز قناع! يعنى العملية إذا كنت هتسب على المدنيين هتسب للناس كلها، لكن هو العملية النهارده إحنا لازم يكون عندنا بالنسبة للجيش بالنسبة للقوات المسلحة كلها بالنسبة للفرق المقاومة، بعدين حتى يعنى المقاومة فى القاهرة هايحوز كامامة ليه؟

ف. فوزى: مش هيلبسها، وزى ما بتقول سيادتك هو عايز يستغل استخدام بالنسبة للقاهرة يضرب تسليح مدمر أحسن ما يدى أو يعمل حاجة.

عبد الناصر: يعنى هو بالنسبة للكيمياوية تبقى على القوات المسلحة أساسا، وبالنسبة للثانية للبيولوجى برضه حتى استخدامها ضدنا..

ف. فوزى: مايجيش إلا إذا كان عاوز نهر النيل بس.

عبد الناصر: لا.. إذا استخدمها ضدنا إحنا إذا استخدمناها ضده يبقى هو خسارته نسبيا أكبر، لأن إحنا ٣٠ و ٣٢ مليون لما يموت ٢ مليون أنا معايا ٣٠ يعنى هو لما يكون ٢,٥ مليون لما يموت مليون يبقى كأن مات ١٥ مليون عندنا، وبالنسبة ليه لازم برضه نستعد للعملية.

ف. فوزى: ماعتقدش أنه هستخدم الاثنين إلا فى حالة يأس، مايجيش يخسر الرأى العالمى.

عبد الناصر: بالنسبة للمليون بتاع الداخلية؟

حجازى: يعنى فيه قرار خاص من ١٠ أيام عند سيادتك يعنى.

عبد الناصر: بتاع الدفعة؟

حجازى: فندوق الطوارئ دلوقتى ولا مليم، تقريبا ١٠,٥ ماجيبناش منهم حاجة، فالمليون ناخده بقى من اعتمادات الاستثمارات الغير مخصصة وفاضل حاجة بسيطة فيها.

سرى للغاية

عبد الناصر: الاستثمارات؟

حجازى: جزء ١٢ مليون مش محددة بمشروعات يعنى فمليون مش هايجرى حاجة.

عبد الناصر: يعنى إحنا الجهاز المركزى فاضحك فى المصور الجمعة اللي فانت، مطلع إن الحكومة معملتش حاجة خالص مش كده؟! يعنى المقالة بتاعة إبراهيم سعد الدين محدش قراها؟! يعنى المقالة دى كرد فعل بتاع إن كلامكم فى المؤتمر كله كلام فاضى! هو الحقيقة إبراهيم سعد الدين لازم ننقله من الجهاز المركزى ولو نوديه عندك فى الخزانة! (ضحك) على أساس الجهاز المركزى فيه معلومات.

حجازى: كان عايز يروح معهد الإدارة.

عبد الناصر: طب معهد الإدارة ده فيه الأمريكان، هيعمل إيه؟ هم الأمريكان مشيوا من المعهد؟

حجازى: يمكن واحد ولا حاجة معظمهم مشيوا.. الأمريكان مشيوا.

عبد الناصر: راحوا فين؟

حجازى: المعهد القومى، معادش فيه ارتكاز يعنى الارتكاز القديم، فهو بعت لى من كام يوم.

الشافعى: دى حاجة جديدة بالنسبة لمعهد الإدارة لأنه كان طالب إنه يروح معهد التخطيط.

عبد الناصر: معهد الإدارة تبع مين؟

جمعة: الجهاز المركزى للتنظيم والإدارة.

حجازى: الأخ حلمى السعيد.

سرى للغاية

جمعة: لو سيادتكم توافق على المبدأ هم أصلهم حوالى ٢,٥ مليون أو ٢,٧ مليون، سيادتكم توافق على المبدأ وبعدين نحلها.

عبد الناصر: نأخذ جزء وجزء يعنى بالنسبة للعملية مش عايزين نقلل الاستثمارات عايزين نزود الاستثمارات، برضه فى الفترة اللي احنا ماشيين فيها دى قد تطول سنوات الحقيقة ومانقدرش نقعد بدون..

حجازى: إحنا بعتنا واحد للسادة الوزراء عشان التمويل على مدار السنة عشان الترخيص للصرف خلال العام كله يعنى.

عبد الناصر: إحنا الجلسة الجايه المفروض هتكون جلسة خطة.

حجازى: هى القوات المسلحة هى اللي ماشية فى الصرف! (ضحك)

عبد الناصر: صرف محلى.

جاء الله: والله بخصوص التقرير اللي المفروض يعرض على المجلس فى الجلسة الجاية، لسه البيانات ماجتش من الوزارات جت بعض بيانات جزئية من بعض المؤسسات؛ أسبوعين النهارده إن مكانتش تيجى البيانات على الأكثر بكرة أو بعده مش هايتيسر إعداد تقرير على المستوى القومى.

غانم: هو لو سمحت لى سيادتكم برضه فى موضوع الدفاع المدنى.

عبد الناصر: لا.. طيب نخلص موضوع التخطيط ده اللي أثاره عايزين بيانات تروح له كل البيانات.

غانم: أنا بعث البيانات بتاعتى.

سرى للغاية

عبد الناصر: لا بنقول اللي مابعتوش اللي مابعتش مش هيقول: أنا بعت على أساس الواحد عايز برضه
بيجي قارئ ورق عشان يقدر يتكلم.

حجازى: إحنا صارفين ٤٠ مليون فى ٣ شهور الأولى.

عبد الناصر: صارفين؟!؟

حجازى: أيوه.. صارفين ٤٠ مليون استثمارات.

عبد الناصر: طب هانشوف ده الجلسة الجاية بقى.

غانم: هو بس كنت عايز أشير لناحية المستشفيات وإعدادها والأدوية، لأن هو فى وزارة الصحة
حصل إجتماعات متعددة مع السادة وكلاء الوزارة، والواقع إن احنا مش مستعدين وأرسلنا
للسيد وزير الحربية خطة معينة لاستكمال استعدادات وزارة الصحة، وبالذات تجهيز بعض
الأدوار فى المستشفيات علشان تعمل فى وقت الطوارئ بتحتاج لتجهيزات معينة ومولدات
كهربائية ومزيد من الأدوية، والواقع إن بعد ضغط شديد الرقم المطلوب حوالى ٢٨ مليون
جنيه..

عبد الناصر: ٢٨ مليون إيه؟!؟

غانم: ٢٨ مليون جنيه ده يعنى بعد ضغط شديد، على العموم بندرس الموضوع مرة تانية بس
حببت أقول..

عبد الناصر: أنا بيتهيألى كل وزارة الصحة ماتساويش ٢٨ مليون جنيه! (ضحك)

أصوات: (ضحك)

عبد الناصر: والسياحة كمان! (ضحك)

أصوات: (ضحك)

غانم: التقرير موجود يا فندم.

داوود: هو فيه خطة موجودة للتخفيف الى أقصى طاقة فى مدن السويس والإسماعيلية.

عبد الناصر: نعم؟

داوود: كان فيه خطة موضوعة لتخفيف مدن السويس والإسماعيلية من ناحية الهجرة الى أقصى طاقة إنما باقية بلا تنفيذ، فأفهم من المناقشة إن الحالة الآن نبدأ فى عمليات التخفيف اللى مطلوبة الى أقصى حد؟

عبد الناصر: آه.. والله وأنا بيتهيألى أول إشتباك هيحصل، وده يمكن السبب بتاع الجدد ده بتاع السويس ده اتكلم هم مركزين دلوقتى صواريخ على المدن صواريخ أرض/أرض؛ فأول اشتباك هيحصل إذا هم اتضربوا فعابزين يعنى يوقعوا فينا خسائر أكثر، فالحقيقة السويس والإسماعيلية بالذات هما النقطة اللى ماسكينا فيها من رقبتنا! على أقصى مايمكن إن احنا نهجر.. نهجر يعنى بدون تعقيد وبدون مانأجل.

داوود: إحنا جاهزين.

عبد الناصر: إحنا لازم نخلص العملية، بورسعيد مرحلة تانية وهى معرفش الصواريخ بالنسبة لبورسعيد أعتقد هى الصواريخ ٨ كم اللى حاطينها؟

ف. فوزى: من ٤ الى ٦ يافندم هى صواريخ ٢١٦ مللى مصنعة محلى تقليد أمريكانى، وأنا مضطر الأسبوع الجاى أعمل محاوله عشان أتعامل معاهم لأن هيسببوا خطورة كبيرة. وهم جم لوعمة بالرغم من الخسائر الـ ٤٥٠ فرد اللى خسروهم يوم ٩/٨ محاولوش يدعموا القوات المسلحة باستعواض لهذه الخسائر، جابوا كتيبتين مدفعية وجم لوعمة وجابوا النيران لكن ماجابوش أفراد. وتبين لى إنه فيه احتمال كبير فى عدم قبول معركة ما بين المضايق وبين قناة السويس، وهم هيفضلوا مثبتيتنا كده بالنيران اللى هى أرخص حاجة بالنسبة لهم، البنى آدم بيوجعهم هناك. الـ ٤٥٠ قتيل دول عملوا يعنى عمال ضد الروح المعنوية

سرى للغاية

للقوات المسلحة الإسرائيلية والشعب الإسرائيلي كبير جدا فى تل أبيب نفسها، فهم حذرين على الفرد. لكن هى الصواريخ بتبهدل خصوصا حى الأربعين اللى هو مافيهوش أبنية.

جمعة: المرتبط يافندم لو سمحت سيادتك بخطة الدكتور عزيز، بأنه كل أما بنخفف من المصانع فى العمال واللى بيخدموا العمال.

عبد الناصر: موضوع التهجير يبقى ماشى.. بنسير للتهجير.

الشافعى: أيوه يافندم، بالنسبة للناس اللى جم خدوا شقق؟

عبد الناصر: هو إحنا عندنا كام شقة فاضية فى القاهرة دلوقتى؟

مصطفى: فى الوقت الحاضر ٩٠٠ نقدر خصصناهم.

عبد الناصر: لا كل الشقق الفاضية اللى هى فى مدينة نصر وفى مصر الجديدة وفى حلوان.

مصطفى: فى الوقت الحاضر حوالى ١٠٠٠ جاهزين دلوقتى، وبعدين فيه منطقة أتبنت وأنشئت وهى جاهزة عند القوات المسلحة لسه ماجهزتش.

عبد الناصر: دى اللى فى العباسية؟

مصطفى: فى مدينه نصر منشآت عامة، ولسه ماجهزتش دى عند القوات المسلحة.

عبد الناصر: دى كام شقة؟

مصطفى: مش عارف العدد.

عبد الناصر: هو أنا الحقيقة برضه بدى أثير الموضوع، هل عملية التمليك ماشية ولا الشقق فاضية؟

سرى للغاية

مصطفى: يعنى ببطء جدا، برضه بسبب القروض بفوائد ومدته التمليك محدودة ١٥ سنة فبتخلى القسط غالى. فكان فيه اقتراح كنت أحب أقدمه، نقلل الفوائد شويه ونزود مدة التمليك ومدة السداد يمكن تخلى القسط بتاع التمليك قريب من الناس، وخاصة بعد ما خفضنا الإيجارات تخفيض كبير فعمل فارق كبير بين التمليك والإيجار.

عبد الناصر: والله أنا عايز نبحت الموضوع ده ونشوفه برضه فى جلسة قادمة، مش معقول فيه أزمة مساكن وفيه مثلا شقق فاضية ماتتشغلش! لأن طلع الأول التمليك بالعملة المحلية وبعدين تمليك بالعملة الصعبة!

مصطفى: أعلننا عن المساكن وهم انشغلوا، دلوقتى العمارتين اللى عند كوبرى الجامعة فيه ناس تقدمت لها بالعملة الصعبة والعملة المحلية وانشغلت دلوقتى.

عبد الناصر: كلهم؟

مصطفى: أيوه.

عبد الناصر: طب مدينة نصر؟

مصطفى: مدينة نصر فيها مساكن اللى بقول لسيادتك عليها اللى جاهزة النهارده، فيه حوالى ألف وباستمرار بتستكمل باقى العمارات.

عبد الناصر: ماهو برضه لما ندى شوية للمهجرين بيتهيالى بنخصص جزء برضه للناس فى القاهرة اللى عايزين شقق أيضا.

ف. فوزى: يافندم أنا متنازل عن المدينة دى كلها ونرجعها لوزارة الإسكان؛ لأن التخطيط بتاعها من وجهة نظر القوات المسلحة كان خاطئ، فيه مدينة أخرى جنب ميدان العباسية.

عبد الناصر: آه.. الشقق اللى جنب ميدان العباسية.

سرى للغاية

ف. فوزى: ماكملتش.

عبد الناصر: آه.. بتكمل دلوقتى ولا؟

مصطفى: عاوزة استثمارات وحسبنا لقينا الأوضه هتكلف ألف جنيه!

عبد الناصر: طب هتسيبها كده معلقة يعنى!؟

مصطفى: لأ.. ما حنا عايزين دلوقتى هذا الأسبوع حسبنا الأوضه هتبقى تمنها ألف جنيه معمولة بطريقة فاخرة جدا واسعة وتكاليفها عاليه جدا والنهارده علشان تستكمل عاوزة مبلغ.

هويدى: مادام يافندم فيه هيكل أقدر أعمل finish بتاعه بدل ما يكلف ١٠٠٠ جنيه أقدر أعمل تكلفة أقل شوية.

مصطفى: عشان الأرض تمنها غالى والتكاليف بتاعة الخرسانات بتاعتها كانت فوق الخيال والأوض واسعة جدا.

عبد الناصر: بأى حال هنكملها يعنى.

مصطفى: هنكملها بس عايزة مبلغ للاستكمال.

عبد الناصر: طب ما تاخذ مبلغ استثمار من احتياطى استثمار اللي عندك.

حجازى: أنا كنت قلت يافندم فى اللجنة الاقتصادية: إن صندوق القوات المسلحة طبعا مش راضى يخش يكمل العمارة، وهم عندهم خبرة الحقيقة بيعملوا مشروعات اقتصادية كويسة يعنى فهو خايف يدخل لأن القيمة المصروف عليها لغاية النهارده كبيره ضخمة، فيمكن لو نعيد النظر فيها ممكن هو يخش ويكمل العملية لأن وزارة الإسكان كانت رافضة.

سرى للغاية

مصطفى: لا.. ماهو وزارة الإسكان عاوزة مبلغ كبير كذا مليون!

عبد الناصر: خلاص نستولى عليها وماندفعش حاجة للقوات المسلحة.

مصطفى: عليها ديون يافندم! (ضحك)

عبد الناصر: (ضحك)

مصطفى: وقرض وفيه فوايد بتتجمع دلوقتى على هذا القرض.

عبد الناصر: بس بكل الاعتبارات دى لازم هنكمل العمارات دى بأى طريقه من الطرق.

حجازى: وفيه إن الصندوق ياخذها وياخذ قرض ويسدد الحساب بعدين.

ف. فوزى: رفض يافندم، الصندوق ناجح وواعى فى تصرفه.

عبد الناصر: طب أمال عمل العملة دى ليه؟!

فوزى: لا.. مش هو، مش القوات المسلحة اللي عملته.

عبد الناصر: آه.

ف. فوزى: فيقول يعنى بعد ما استلمت قلت أديها للمختص.. لوزارة الإسكان

الشافعى: وبعدين رجعت تانى يعنى! (ضحك)

عبد الناصر: لا بياخدوها الإسكان ويحلوا الموضوع، وبعدين نتفق إزاي نحل المشاكل.

سرى للغاية

مصطفى: هو مستعد أنه يكملها ومسائل التكاليف دى تبقى تدرس.

عبد الناصر: يبقى اللي احنا عاوزينه، الحقيقه الشقق اللي عندنا الفاضية عايزينها فى خلال شهر أو شهرين لازم تسكن يابنسكنها بالإيجار يابنيبعها ب ٢٠ - ٢٥ سنة؛ مش معقول عندنا أزمة مساكن وفيه شقق فاضية!

الشافعى: نعيد النظر فى الشروط كلها والاعتبارات وفى أسبوع نتقدم باقتراحات محددة.

عبد الناصر: بالنسبة لموضوع الهجرة حد هيتكلم ولا؟

الشافعى: أيوه ياريس موضوع الهجرة زى ما اتفقنا عليه هو مكتوب على كل حال.

عبد الناصر: إحنا مش عاوزين حصة مطالعة يعنى! (ضحك)

الشافعى: لا أصلها قرارات.

داوود: المشكلة الرئيسية اللي كانت بتبحث هى مشكلة الإسكان، بقية المشاكل ميسرة عمليات الإعاشة، وعاملين احتياطي كافي لمواجهة احتمالات الزيادة فى الإعاشة. كان فيه نقطتين رئيسيتين..

النقطة الأولى: هى نقطة الإسكان، الرغبة فى نقل بعض الإدارات من الشركات والمؤسسات وبعض العمال الى القاهرة.

عبد الناصر: والأرشيف والحاجات دى كلها والناس اللي مالهمش داعى.

داوود: فاتفق على حلين.. إنه كل هيئة لها فرع هناك يعنى مؤسسة وليها شركة تحاول إنها تستوعب الجزء الأكبر، واللى يفيض نحطه فى الإسكان ودى بيحصل فيها اتفاقات. وفى الوقت نفسه بنيسر لهم فى حدود ٩٠٠ شقة الأماكن الخاصة بسكن هؤلاء الأفراد اللي هيجوا تبع للعمليات دى، وماشية الدراسات على هذا الأساس.

سرى للغاية

بالنسبة للعمارات اللى سكنت كان اتجه الى إعادة البحث، وتشكلت لجنة برئاسة السيد عبد المحسن أبو النور على أساس إنها بتدرس حالة الناس اللى سكنوا ومدى ارتباطهم بالقاهرة؛ لإمكان النظر فى تهجير بعضهم اللى مالوش مصلحة فى الإقامة فى القاهرة، إن احنا نوديه الى أماكن أخرى علشان نفسح مكان فى القاهرة لناس أكثر حاجة والعمل ده بيتم وهينتهى خلال الأسبوع، غالبا البحوث اللى بتجرى حوالى ٢٦٠٠ حالة بالطريقة دى.

الموضوع التانى: موضوع القروض اللى بيدوها للتجار واللى بتتزايد وتوحيد قواعد الصرف ما بين المحافظات الثلاث، وبرضه فيه لجنة مشكلة وقربت تنتهى من عملها على أساس إن هى بتبحث عمليات القروض، وتوحيد المبالغ اللى بتصرف والتوفيق ما بين القروض والإعاشة بحيث إنه ما يحصلش ازدواج فى الصرف من الجهتين.. دى تقريبا أبرز الـ ٣ مشاكل الرئيسية اللى كانت فى التهجير.

عملنا إحنا ميزانيه كاملة من هنا لنهاية السنة المالية بخصوص احتياجات التهجير، وعاملين حسابنا باحتياطى حوالى ٣٠٪ لاحتمالات المستقبل فى التهجير.

بالنسبة للطلبة، عملنا لهم بمناسبة العام الدراسى بعض نظم فى حدود الإعتمادات اللى موجودة يعنى لم تتجاوزها وكانت ماشية السنة اللى فاتت؛ لأن كان بيحصل عملية ازدواج لأن بعض المحافظات كانت بتصرف والشئون الاجتماعية بتصرف ووزارة التعليم العالى بتصرف.

السنة دى وجدت بإن احنا عاملين حالات بحث للطلبة وبنصرف لكل طالب. المدن الجامعية أعفو من رسومها وبنصرف للطلاب المقيم فى المدينة الجامعية ٢ جنيه فى الشهر بعد البحث الاجتماعى، الطالب اللى مش ساكن بنديله ٥ جنيه. ويسرنا لهم سبل المواصلات أيضا للبعض الخارجين من محل إقامته الى المدن أو المعاهد العليا، وبدأت فعلا عمليات الصرف وبنديهم ٥ جنيه زيادة فى أول العام الدراسى علشان يواجهوا بيه مسئوليات العام الدراسى اللى فى الكليات العملية، التى عندهم مشروع فى نهاية السنة بنديهم ٥ جنيه زيادة علشان يواجهوا بيها احتياجات المشروع وماشية العملية.

عبد الناصر: مافيش تعطيل؟

داوود: لا.. ماشية.

سرى للغاية

الشافعى: هو يمكن أهم موضوع الناس اللى احتلوا مساكن فعلا عايزين يبعدها من هذه المساكن بحيث تتحل مشاكلهم، يعنى برضه اتفق إنه يتعمل بحث تفصيلى بالنسبة لكل حالة، ويتم إقرارها من لجنة برئاسة الأخ عبد المحسن عبد النور ويبقى قرارها نهائى، يإمأ إنها توديه فى سكن آخر.

وبعدين موضوع العمال، لأن كان برضه فيه تخفيض العمال اللى موجودين فى السويس بالذات ومعتبرين إن القاهرة هى النقطة الوحيدة اللى يقدرها يهاجروا إليها، فقلنا الناس دول؛ لأنهم مطلوبين للعمل هناك، دول يسمح لهم بأنهم يستتوا فى السكن المناسب لأن هم خفضوا القوة ٥٠٪ وخلصوا المصانع أظن تشتغل ٣ أيام عشان يخفضوا العدد؛ فطبعا دول عاوزين مساكن تكون قريبة ومريحة ويقدر يرجع فيها للسويس مباشرة بحيث إنه يوفق ما بين التخفيف وما بين الانتقال وكثرة العمل وإسكانه فى نفس الوقت.

داوود: هو كان فيه اتجاه للتهجير الى أسوان على أساس إن فيه بعض العمارات فى السد العالى فضيت، إحنا بعتنا نتحرى فوجدنا إن كلها يادوبك توفى احتياجات القوات المسلحة والعمارات اللى بتفضى بيستلموها وما فيش حاجة موجودة حاليا.

الشافعى: بالنسبة للوزارات والمصالح اللى جت هنا، قلنا: لازم وزارتها تسعها فى مبانيها إلا إذا كان مالهاش وزارة هنا فهنخصص لها جزء من الإسكان الإدارى اللى هى كانت مبنية أساسا عشان تكون مكاتب؛ يعنى كان فيه مراجعة لكل التفاصيل اللى أثرت. بالنسبة للتربية والتعليم والمدرسين، برضه قلنا: وزارة التربية تصرف لهم من الاعتمادات الخاصة للمدرسين.

جمعة: لو سمحت سيادتك، هى عملية إعادة البحث وبعدين نطلع الناس من الشقق تانى ونهجرهم دى هتتير مشاكل. حصل فى فترة من الفترات وسيادتك ما كنتش موجود هنا، جم بعض الناس من اللى كانوا قاعدين ومش لاقيين شقق ودخلوا فى الشقق وقاعدين فيها. النهارده هنخش ونبحث حالتهم وبعدين نطلعهم من الشقق دى ونوديهم شقق تانية أو نطلعهم بره القاهرة، أنا بعنقد إحنا بنرضى بالأمر الواقع الى النهارده وبنبتدى نبحث حالة الناس اللى هنهجرهم من جديد؛ لأن دى هاتتير مشاكل فى وسط الناس كلها.. ده رأى الشخصى.

سرى للغاية

الشافعى: هو طبعا برضه هذا الرأى أثير وبرضه الأخ شعراوى يمكن يشوفها من وجهة نظر الأمن علشان مايقفلش مواقع الناس، بس فيه ناس احتلت أماكن لا تتناسب مع ظروفها ولا أوضاعها. وبعدين إذا مشينا على أساس الأمر الواقع، أنا مابقولش إن أنا هاطرده قبل مانبحث ظروفه ولازم أكون ملتزم بإن أنا أجيب له الحاجة المناسبة.. وده يعنى اللجنة ملتزمة بهذا الكلام.

داوود: وإحنا حاليا مانعين الهجرة الى القاهرة، يعنى أى مهاجرين من الأعداد الجديدة بنهجرها الى المحافظات الأخرى مجهزين لهم فيها أماكن مبنتمدش أى واحد ييجى القاهرة.

عبد الناصر: بالنسبة للجنة التنفيذية العليا، حد ليه رأى فى الموضوع بيتهيالى محدش هيتكلم! (ضحك)

أصوات: (ضحك)

غانم: سيادتك ليك سلطة التفويض يا فندم.

عبد الناصر: أصل هى شغلانة وأنا الحقيقة وصلت لعه حاجات كده.. أول نقطة: عدم الجمع بين الوزارة واللجنة التنفيذية العليا؛ اللى بيروح اللجنة التنفيذية هيروح الوزارة ومش هيهتم بالعملية.

هو الحقيقة لو قدرنا نمشى بالموضوع systematic وبنوع من التفاهم والهامونى، وأنا رأيى إن اللجنة المركزية كويسة جدا ناس كويسين أوى، وأنا يمكن أكثرهم بشوفهم لأول مرة، وأنا تعمدت الحقيقة إن أنا أسيب كل واحد يتكلم عشان الواحد يعرف الناس. اللجنة المركزية كويسة جدا، لو فعلا مشينا باللجان ومسكوها ناس وحصل نوع من الطريقة زى الطريقة الحزبية؛ سياسة الحزب بتننفذ بيجوا العمال بيأمموا الحديد ويعملوا كذا زى ما سياسة الحزب وكذا.

وبعدين برضه عملية الرقابة: الحقيقة هناك حملة فى البلد ضد الوزراء وبالذات ضد وزراء الإنتاج، على إن كلامهم كلام مش حقيقى وكذا مع إن هذا الكلام بيتنقل الى كل الميادين. دلوقتى أنا اللجنة المركزية هحاول أجمعها باستمرار كل أسبوع لأن اللى بيروح ده هيروح فى البلد وهيقول؛ قاعد مع الوزارة وقاعد مع رئيس الجمهورية فهيروح يتكلم. وأنا فعلا تعمدت فى الكلام عن الوضع السياسى إن أنا أبين لهم إنهم موضع ثقة، دول الحقيقة ك ٢٠٠ واحد بينتشروا فى كل حته كل واحد بيعقد يتكلم.

سرى للغاية

لو إحنا تعاملنا مع اللجان، وهم استجابوا للكلام الللى احنا قلناه - العملية الللى أثارها السيد مرعى - لكن الحقيقة لازم إحنا لصالحنا. فى مجلس الأمة فيه ناس كانوا مقدمين استجابات ولكن غير اللجنة المركزية، لكن فى اللجنة المركزية لو بنوضح الأمور ونعتبره جهازنا مش جهاز رقيب علينا أبدا هم ناسنا وجهازنا. وبعدين إحنا لو نلم الفلاحين الللى فى اللجنة المركزية، ونقعد نقول لهم: قولوا لنا إيه رأيكم فى تسويق القطن؟ ناصحين، وأنا رأبى كل واحد بيحدد يتكلم فى الموضوع ولأنه حاسس بالمشكلة، وأظن شوفتوا فى المؤتمر إزاي وقفوا اتكلموا خصوصا بعد الظهر.. فيه جلسات بعد الظهر أكثر من جلسات الصبح.

وأنا الحقيقة بكره هاشوف الأمناء بتوع المحافظات كلهم، برضه أسألهم رأيهم إيه؟ أول نقطة فى راسى: الللى بيدخل اللجنة التنفيذية العليا بيسيب الوزارة ويبقى له مكتب واحد مش مكتبين. إذا دخل وبقى له مكتبين يروح الوزارة لأن الوزارة هى الللى ليها الهيلمان، بتحكم على تجارة القطن وبتحكم على كذا شركة وبتقدر تعين وترقى وترفد! (ضحك)

وبعدين برضه الوزارة هى الللى واخدة الوضع الأساسى، فإذا جمعوا بين هذا وذاك هتغطى الوزارة. وبعدين حتى أما نجيب مثلا ١٠ - ١٤ واحد من الوزارة وزراء ويبقوا لجنة تنفيذية عليا، مين بقى هيسألهم ولآ مين هياخد ويدي معاهم فى اللجان والعمليات دى؟! محدش.. بتبقى العملية بتلغى نفسها وبتبوظ العملية من الأول.

إذا كان حد ليه كلام برضه نحب نسمع. الحقيقة أنا معنديش رأى لسه للغاية دلوقتى للغاية يوم الأربعاء، يعنى مش هاكون رسيت يعنى بمشى بالطريقة دى بفضل للغاية آخر وقت بالنسبة للجنة المركزية للغاية الساعة ٦ إلا ٥ قبل ما أطلع من البيت، اتحطت أسامى جديدة! (ضحك)

أصوات: (ضحك)

شقير: يافندم الرأى الللى سيادتك انفضلت بيه فيه نقطة مهمة جدا بخصوص المكاتب الفنية للجنة الوزارية، أنا بعتقد إن دى صمام أمان كبير جدا ومهم؛ لأن اللجان لما تتشكل قطعا لازم ندى ثقة كبيرة فيها لأخوانا بتوع اللجنة المركزية، إنما جزء منهم يمكن مالمسش المشاكل الفنية والمشاكل الواقع الللى بتخلى الآمال، سيادتك عبرت عنها "يجب" بتساوى ٥ مليون جنيه و "يجب" بتساوى ٦ أشهر؛ ده صحيح لو المكتب الفنى الموجود تبع كل لجنة كان مكتب قوى نستطيع جزء كبير جدا من الصدام الللى ممكن ينشأ إننا نتلافاه خالص، بالعكس نقنعهم برأينا ويتحولوا الى دعاة.

سرى للغاية

عبد الناصر: إنتو الحقيقة يعنى واجبكم، هم الناس كلجان هيببقوا تعبانين لأن العملية لسه عملية جديدة، فالحقيقة إنتو فى تصرفكم ماتاخذوهمش كرقباء ومحاسبين لأ وتساعدهم فى إعطائهم.. ماإحنا مكتب فى لازم هنتدب ناس ونجيب ناس ساعدهم فى هذا تلاقى العملية ممكن إنها تمشى.

غانم: هو يافندم فيه سؤال خاص بلجان اللجنة المركزية.. هل الوزراء بيقدموا طلب عضوية فى اللجان يختاروا لجنة ولا بيبعدوا عن اللجان؟ لأن النهارده جات لنا جوابات..

جاب الله: بعقولنا النهارده علشان إبداء الرأى الرغبة الأولى والثانية.

عبد الناصر: هو أنا رأيت إن الوزراء ميدخلوش فى اللجان يعنى هم الوزراء بيبقوا فى اللجنة ساعة أخذ القرار فى اللجنة المركزية، ولكن مثلا الوزير ممكن اللجنة اللي تختص بوزارته بيروح فيها مرة مثلا كل أسبوع أو كل عشر أيام أو كل أسبوعين، بيقد مع اللجنة وبيتكلم يعنى بيضيع يوم بعد الظهر يتفق مع اللجنة ويروح هناك؛ بهذا بيبقى الوزير كأنه عضو فى اللجنة.

والحقيقة برضه بقول: إن احنا عايزين نسيّس الناس دول ونمشيهم بحيث إنهم بيقوا دعاة لينا. الحقيقة مجلس الأمة مشى كويس، لكن بعد كده بقوا يروحوا يقولوا: إن احنا معندناش فرصه نتكلم إن احنا مش فاهم إيه إن احنا مضغوط علينا إن كذا، ولهذا الحقيقة يمكن فى اللجنة المركزية نفتح صدرنا خالص واللى عايز يتكلم ويتكلم واللى عايز يقول أى حاجة يقول أى حاجة، ليه؟ لأنهم إحنا عايزين نعتبرهم دعاة لينا مهماش رقباء علينا.

غانم: هو برضه زى ماسيادتك بتقول الواقع إحنا عاوزين نعتبر نفسنا جزء من الاتحاد الاشتراكى يعنى حتى مش نعتبرهم دعاة لينا، يعنى إحنا أعضاء فى الاتحاد الاشتراكى وإحنا جينا برضه باعتبارنا عملنا فى الاتحاد الاشتراكى. والفكرة دى موجودة عند الكثيرين، يعنى الناس اللي كانوا قاعدين حواليا فى اللجنة المركزية كانوا بيثيروا النقطة دى؛ يعنى إنت جاي وزير لأنك كنت فى الاتحاد الاشتراكى وجيت وزير، أقول لهم: آه فعلا.. وبالتالي الوزارة الموجودة هى وزارة الاتحاد الاشتراكى أو جزء من الاتحاد الاشتراكى. دى النقطة اللي لازم تكون ثابتة فى أذهاننا، إن احنا جزء من الاتحاد الاشتراكى يعنى جسم واحد وإحنا جزء منه.

سرى للغاية

عبد الناصر: هو طبعا الحقيقة إذا كان هيبقى فيه التقاء بين اللجان والوزراء وتفاهم وده هيصب فى اللجنة المركزية وهيبان فى الاجتماعات هياكد هذا الكلام، لكن إذا مثلا غالطنا أو مادينا همش بيانات أو ماتكلمناش معاهم على طول هتبص تلاقى يحصل نوع من الاحتكاك أو نوع من التصادم.

البشرى: هو فيما يختص بعضوية الوزراء فى اللجان، بيتهيالى يفسر وجود الوزراء فى اللجنة المركزية إنهم أعضاء فى اللجنة المركزية. أنا بيتهيالى لو نيجى النهارده ونقول فى اللجان مايدخلهاش الوزراء، يبقى فيه فصل شوية والموقف فيه نوع من الحساسية. وبعدين لو عملنا عملية نلتقى مرة كل ١٥ يوم برضه يمكن نقل شوية الانفصال، وده لو حصل يوم ورا يوم هيقول الانفصال خالص. ودى من واقع تجارب من اجتماعاتى فى المصانع مع العمال مرة فى مرة بنقل الحساسية. والعملية دى متهاىلى بتخلينا طبيعيين شوية وتساعدنا أيضا فى إن بياناتنا ماتبقاش مصطنعة وبتترك أثر نفسى كويس.

عبد الناصر: مش هتواظبوا على حضور اللجان، إفرض يعنى اللجنة كلجنة دائمة هيجتمعوا كل يوم، المفروض يعنى اللجنة أصلها دى أتصور اللجنة بتاعت اللجنة المركزية بتشتغل شغل مستمر يومى. يعنى فى البلاد اللى عاملة لجنة مركزية بيشتغلوا شغل يومى خصوصا رئيس اللجنة حد معاه وليه عمل. يمكن أنا شوفت فى الاتحاد السوفيتى مثلا أما كنا روحنا آخر مرة، رئيس لجنة العلاقات الخارجية جه حضر المباحثات معانا اللى هو اسمه بارامارى وقعد أقدم من جروميكو وزير الخارجية.. قاعد قبل جروميكو، وبعدين ده فعلا اللى هو بيوجه السياسة الخارجية من اللجنة المركزية.. ده اللى بيتبع؛ فإحنا دلوقتى لو دخلنا الوزرا فى اللجان الوضع الحقيقة بيتهياىلى مش هيمشى صح.

الشافعى: هو الحقيقة إحنا حاولنا نتصور طريقة العمل؛ لأن هى يمكن طريقة العمل اللى هتبين لنا إزاي هنتغل كجهاز تنفيذى مع اللجنة المركزية. طب هم النهارده مشكّلين موضوعيا على لجان سواء سياسية أو اقتصادية أو.. أو.. الى آخره، وبتتناول الموضوعات بتشمل أكثر من وزارة فهم على أد ما هيسيروا فى البحث بالنسبة لنقط معينة. وطبعا يمكن قرارات المؤتمر بالذات هى المحك المباشر لبدء العمل أو المواضيع اللى احنا بنبحثها وبنحليها على اللجنة المركزية بعد ما بيقرها مجلس الوزراء، مش هنتقدم بيها كوزراء ولكن هنتقدم

سرى للغاية

بيها كموضوع انتهى فيه إن ده صالح لأن يناقش فى اللجنة المركزية، وبينتقدم بيه مجلس الوزراء ككل مش كوزارة بتروح تتكلم عن موضوع معين.

والحقيقة الروح اللي احنا لمسناها كان فيه روح تحفز من اللجنة بالنسبة لرد الفعل على كلام الأخ سيد مرعى لما أثار الوضع بالنسبة للوزارة والحكومة. المكاتب الفنية اللي هتعمل أو اللجان هتبقى مجال لبحث إيه؟ يعنى لو هنجى مثلا موضوع معين، إذا كان ده هيبقى فرصة لبحث الموضوع من الناحية القومية اللي بتشارك فيها كل الجهود بما فيها التنظيم السياسى كمسئولية، بتقدر تدفع العمل القومى حقيقة فى الموضوع بحيث إنه يبقى كل واحد - زى ما يمكن السيد الرئيس عبر وقالها - على إن زى ما الوزير بيحاسب يعنى الأمين بتاع المحافظة بيحاسب على وجه معين أو بيعين له واجب معين.

يعنى إحنا مثلا فى مجال بحث عملية تنظيم الأسرة كموضوع أو عملية محو الأمية كموضوع، لو تصورنا يعنى إن الموضوعين دول بيوضعوا فى المناقشة بالنسبة للجنة المركزية، ما من شك إن الدور اللي هيقوم بيه الجهاز السياسى والعمل السياسى بدور ضخم جدا تشترك فيه الإدارة المحلية وتشترك فيه أكثر من وزارة ويشترك فيه العمل السياسى، وبهذه الأنواع من المواضيع الكل بيكون حاسس إن له دور فعال فى العملية؛ يعنى أنا فى إعتقادى إنها هتكون الفرصة لخلق الجو الحقيقى. يعنى هو اختيار المواضيع بأولويات معينة تساعد على إنه أكثر من جهة بتناقش الموضوع والجهاز السياسى بيحس إن له دور فعال فى العملية؛ يمكن دا يكون المدخل اللي يساعد فعلا فى تدوير الحساسيات والظرفية اللي يمكن كانت باينة.

ولذلك إحنا كنا برضه بنرجو إن أى وزارة تتقدم بموضوع بيبحث فى لجنة وزارية ثم يعرض على مجلس الوزراء، إذا أقرت إن هذا الموضوع بيبحثه المبدئى من وجهة نظر الوزارة ككل يصلح بإنه يكون مجال بحث فى اللجنة المركزية فبنروح فيه كلنا ندافع عنه يعنى مافيش حد بيختلف فيه. ودا مايقاش يعبر عن رأى فلان أو فلان أو فلان من الوزراء، ولكن بنبقى إحنا جميعا متبنين وجهة نظر واحدة. ولذلك حتى يمكن بهذا الشكل ممكن وزير يروح يتكلم عن أكثر من وزارة فى موضوع معين؛ لأنه ألم بجوانب الموضوع كمشكلة قومية تتبناها الدولة بجميع اللي يقدرنا يساعدوا فيه.

سرى للغاية

سليمان: ولو برضه إستكمالاً للحديث فيما يختص باللجان الخاصة باللجنة المركزية، يعنى أتصور إن أكبر عدد من أعضاء المركزية بيرغب إنه هو ينضم الى لجنة أخرى من اللجان الللى تم تشكيلها الللى اتفق عليها.

فى تصورى أنا - زى ما قال دكتور لبيب - إن لابد أن كل لجنة يبقى ليها جهاز فنى قوى، فده مفروض إن هو يحضر الأوراق والمذكرات والدراسات الللى تعرض على اللجنة، وفى هذه الحالة هيتفرغ أقل عدد من أعضاء اللجنة المركزية ليكونوا متفرغين للعمل فى هذه اللجنة لمعاونة سواء رئيس اللجنة أو المكتب الفنى. يبقى إذاً فيه صعوبة إن اللجان دى تجتمع كل يوم إلا إذا فرغنا عدد كبير، وقد لا يتاح تفرغ عدد كبير من أعضاء اللجنة المركزية.

ده بينقلنى الى اللجنة التنفيذية العليا: فيه اللجنة التنفيذية العليا وفيه مجلس الوزراء ولابد إن الجهازين يكونوا مترابطين ترابط قوى بحيث إنه يبقى معروف إيه الللى حصل هنا وإيه الللى حصل هناك. ده يقتضى إن فيه بعض الوزراء يصح بحكم وظائفهم بيقوا أعضاء فى اللجنة المركزية أو يبقى فيه بعض الوزراء مش ضرورى يقوموا بعمل تنفيذى، إنما يكونوا موجودين هنا وهنا. يعنى يصح إن أعضاء من اللجنة المركزية بيقوا وزراء دولة أو العكس، يعنى فى التنظيمات الخارجية كلها فيه ارتباط، وترابط بين العضوين الأساسيين الللى هما مجلس الوزراء واللجنة التنفيذية العليا.

أخشى إن لو ده طقم وده طقم آخر منفصل خالص يبقى فيه عزلة فى التفكير بين هنا وهناك.

ده الللى حبيت أقوله.

غانم: هو لو تسمح لى سيادتك، هو فيه ملحوظة لفتت نظرى فى اجتماعات اللجنة المركزية، وهى إن المناقشات واهتمامات أعضاء اللجنة المركزية انصرفت بالدرجة الأولى لعلاقة اللجنة المركزية بالحكومة.

عبد الناصر: أنا الللى أثرت الموضوع. (ضحك)

غانم: معلىش إنما فى باقى المناقشات وحتى فى تقارير اللجان، كان التقارير كلها بتركز على وضع اللجنة المركزية مع الحكومة، والمناقشات برضه أثارت وضع اللجنة المركزية مع مجلس الأمة.

سرى للغاية

هو الواقع إن النقطة اللي ماحصلش فيها كلام كثير اللي هو دور اللجنة المركزية فى تشييط العمل الحزبى للاتحاد الاشتراكى وفى اختيار الكوادر؛ فى الواقع دى عملية كبيرة جدا لا فى تقرير لجان ولا فى المناقشات حصل كلام على تشييط العمل الحزبى، ودى مهمة اللجنة المركزية فى كل دولة. حزب العمال زى ما سيادتك قلت برضه أو فى روسيا أو فى أى بلد بنجد إن اللجنة المركزية بيبكون عملها الأساسى بينصب على تشييط العمل.

عبد الناصر: فيه لجنة اللي هى اسمها لجنة الإثارة اللي احنا مدخليها لجنة التنظيم.

غانم: هو لجنة التنظيم أما نقرا اختصاصها نلاقه واسع جدا، وفيه كلمة واحدة شئون العضوية وشئون التنظيم.. يعنى بعتمد برضه إن احنا لازم ندى العملية دى أهمية خصوصا إن الأعضاء اللي اتكلموا على النشاط الحزبى أجمعوا على إن النشاط الحزبى مجمد أو شبه مجمد، يعنى ده مش صحيح ١٠٠٪ إنما اللي نقدر نقوله: إنه عايز دفع ومايجبش إن احنا نوجه المناقشات كلها فى اللجنة المركزية الى أمور غير الأمر الحزبى اللي هو بيهما. جهاز الاتحاد الاشتراكى مُنشأ، وبنحتاج اليه حتى فى العملية الحكومية يجب إن الاتحاد الاشتراكى فى تنفيذ قرار فى المؤتمر بيعتمد على الجهاز الشعبى بتاعه فى الحصول على المعلومات؛ بيعتمد على الجهاز الشعبى يعنى بيبقى له نافذة على الحكومة إنما اعتماده الأساسى على الجهاز الشعبى. والحكومة لما بتتعامل مع اللجنة المركزية، فهى بتتعامل مش عشان تصحح وضعها لأن المفروض إنها على علاقة قوية باللجنة المركزية، إنما إحنا بنلجأ للجنة المركزية عشان تساعدنا فى تنفيذ قرارات المؤتمر القومى، تساعدنا فى العمل التنفيذى.

بس دى النقطة اللي كانت لفتت نظرى.

عبد الناصر: هو ده اللي الكلام فى الأول لازم يبقى بالشكل ده، لما الحقيقة الناس بترتاح بياخد الوضع صورة أخرى أو شكل تانى.

مرعى: يعنى لو سمحت لى سيادتك الصورة بتاع اللجان الدائمة فى اللجنة المركزية، أنا مش متخوف من حساسية أو غير حساسية لو اتبع الأسلوب اللي أنا متصوره بالنسبة لعمل اللجنة المركزية، وهى صورة مشابهة جدا للفترة الأولى لمجلس الأمة. وأنا متذكر من تعليمات سيادتك فى الفترة اللي أنا كنت فيها فى مجلس الأمة، إن احنا مايقاش فيه

سرى للغاية

حساسية وإن الوزراء ييجوا اللجان، وفعلا فى الدورات الأولى مكانش فيه أى نوع من الحساسية ونوع من التآلف موجود، وبعدين حصلت جملة تطورات مافيش داعى لذكرها الآن.

اللجان المركزية على تصورى مهياش اللجان الدائمة المتفرعة مع اللجان المركزية، مهياش لجان أسلوب سياسى مفصل هى لجان أسلوب سياسى مُجمل، وفى رأى إنها يجب فى المرحلة الأولى إنها تمسك فى النقط دى. ده مايمنعش من أن الأسلوب السياسى المفصل هيبجى بشكل آخر؛ يعنى أنا متصور مثلا إحنا دلوقتى مقبلين على تغيير فى النظم التعاونية لشكوى الناس من الجمعية التعاونية ومقبلين على تغيير فى نظم التسليف، أنا بيهمنى كوزير فعلا.. فعلا مش تمثيلا ولا إن أنا أمشى فى إطار تحسين موقفى مع اللجنة المركزية، يهمنى إنى أستعين بأكبر رأى ممكن فى هذين الموضوعين لأن الموضوعين كبار وكبار على تفكير أى واحد يعملهم، إنما متعلقين بمبدأ عام مش متعلقين بأن واحد يقول لى إن المشرف الفلانى فى الجمعية التعاونية الفلانية بيسرق أو إن مجلس الإدارة الفلانى انحرف، لأ.. إحنا عايزين الأول ما هو هذا الخط.

فى إعتقادى إن اللجان التنظيمية فى أول مرحلة لتنشيطها داخل اللجنة المركزية، بيكون إن الوزير المختص الذى ليس هو عضو.. يعنى أنا موافق أنه مايقاش عضو أبدا لأنه لو قلنا عضو فى اللجنة بننفى الوضع الطبيعى؛ لأنه هناك فيه وضع طبيعى موجود وقائم وهو مسئولية تنفيذية ومسئولية رقابة ومتابعة ومعرفة. فأنا الجزء بتاع المعرفة هو اللى بيهمنى فى هذه المرحلة، وهى إنه بمجرد اللجنة تتم وزير الصناعة بيروح للجنة الصناعية ووزير الاقتصاد بيروح للجنة الاقتصادية ووزير الزراعة بيروح للجنة الزراعية، بيقد يدى إيه هى السياسة الموجودة ليه وزير الصناعة يمشى فى عملية التنمية؟ ليه هو ماشى فيها؟ ما هى الأضرار وما هى المزايا بتاع هذا؟ وبيناقش ووزير الزراعة أيضا ووزير الاقتصاد أيضا وبيتوجد هنا أسلوب عمل فى إطار السياسة العامة.

فى أثناء الجلسة قطعا فيه شكاوى ملحة، يعنى أنا أما آجى أتكلم فى الجمعية التعاونية قطعا هيثار مشكلة التسويق الحالية، الراجل ماقبضش فلوسه بقاله ٢٠ يوم ولأ ٢٥ يوم كل اللى فى ذهنه هذه العملية مش هيسم لى كلام، ده جانبيا وده الواقع جزء من عملنا اليومى إن احنا بنقابل أى ناس أو بنتكلم فيهم هيبقى ده جانبيا. دى اللى تيجى الصورة اللى اتكلم عليها الأخ البشرى، وهى بعد ما بنتكلم بنقعد قعده بقى بيحصل الدردشة.. لأ.. ده الجمعية الفلانية كذا. من هنا بيحصل نوع من التآلف وما بنتوجدش الحساسية فى أنه اللجان الدائمة التابعة للجنة المركزية هى لجان لا تجتمع يوميا بتجتمع

سرى للغاية

عند كل مناسبة من المناسبات، إنما بالصدفة لكون اللجنة المركزية منشأه حديثاً فمن الواجب إنها تدرى وتعرف ده الحزب بتاعنا، تعرف إيه هي السياسة بتاعتنا.

الواقع النقطة دى كانت دايمًا نقصانًا.. كانت نقصانًا حتى فى الاتحاد الاشتراكى، وكانت نقصانًا فى مجلس الأمة قبل عمل التنظيمات بتاعة مجلس الأمة. لما عملت تنظيمات مجلس الأمة، كان فعلاً ليها فائدة إنه كان العضو بتاع التنظيم بيبقى عارف أنا مابديش أمور موجهة، لأن إيه هو التوجيه؟ هو التوجيه أحياناً بيكون بالمعرفة معرفة الموضوع معرفة إيه سبب إن احنا خدنا هذا القرار. كنا إحنا فى فترة من فترات مجلس الأمة بنبقى تايهين، آخذ قرار - وأنا كنت بعيد على الصورة التنفيذية - ماعدناش عنه أى فكرة! فيمكن بينى وبين نفسى مابقاش مقتنع بيه ويبقى نفسى أعارضه، إنما لما بييجينى حد من المسؤولين ويقول لى: خلى بالك القرار ده أخذ عندنا لظروف معينة، جازر جدا نقتنع مبيقاش حتى موجه أبقى مقتنع.

فإذاً اللى أنا متصوره فى اللجان الدائمة التابعة للجنة المركزية، هى لجان ستجتمع فى الفترة الأولى اجتماعات طويلة لمعرفة ماهو الأسلوب السياسى للدولة وتقول ملاحظاتها. ويجب أن يكون عندنا إحنا من سعة الصدر وسعة التقدير إن احنا نسمع أى ملاحظة موجودة بالنسبة لعملنا، قد نغير قد نرى إن احنا غلطانين غلطة، بعد هذا المفروض إن احنا وهم اتفقنا على الإطار العام للسياسة.

وأنا بضرب مثل للقطاع الزراعى بمسائل حية موجودة، نتفق معاهم هنجرى الانتخابات إزاي؟ طب هى إيه الشروط العضوية اللى إنتم عايزينها؟ طب الانحرافات الموجودة بنعمل فيها إيه؟ طب ما هى مهمة المشرف؟ طب إيه الدور بتاع بنك التسليف؟ وهكذا، وده ممكن أن يتكرر فى القطاعات الأخرى دى هنا وقت.

بعد كده اللجان مابتجتمعش كل يوم لأن أصبحت على صورة وعلى وضوح، لأن هناك سياسة عامة هى لما تروح البلد بتاعتها هتتكلم تقول والله النهار ده جالنا وزير الصناعة واتكلم فى كذا ويجب إن التنمية تشمل.. وواحد يقول له: لأ.. أنا مش عايز تنمية ويقول له الأضرار اللى تنشأ.. ده الجزء الأول.

إنما بالنسبة للتفصيلات أيضاً أنا ما بمنعهاش، بقول ده يتواجد الوزير لأنه من وقت لآخر بيجتمع، وفعلاً اجتمعنا أول إمبراح مع أعضاء الفلاحين الموجودين فى دار التعاون وحصل نقاش فى الجمعية التعاونية. وفعلاً يجب أن يكون الوزير وثيق الصلة، ويجب إنه لما يفكر فى حاجة جديدة ويطبقها أحسن له.. أحسن لنا ألف مرة إن احنا نقعد مع هؤلاء الناس نقول لهم: إحنا والله بنفكر فى الموضوع الفلانى رأيكم إيه؟ وبعدين لو لينا

سرى للغاية

سياسة أو توجيه معين إحنا بنقدر إن نشرّهم هذا التوجيه فى حدود الاقتناع وبيعكسوا الصورة بتاعتنا.

أنا مش متصور إنه يجب يحصل حساسية، هتحصل حساسية لو حاولنا نوجد دور غير طبيعى للجنة المركزية أو دور غير طبيعى للجهاز التنفيذى، إنما لو مشينا فى الإطار اللى أنا بقوله مش متصور إن الحساسية هتتوجد وخاصة بعد إزالة الجزء الثانى اللى هو خاص بلجنة المتابعة.. ده عن الجزء الأول من كلامى.

عن الجزء الثانى بالنسبة لدخول وزراء اللجان، أنا مابواقش على دخول وزراء اللجان لأن الوزير هو وزير مسئول تنفيذيا، ولو إنه جاى بانتخاب حقيقى فى اللجنة المركزية إنما مهما كان واتكلم الوزير ويجب أن يتكلم فى هذه الحدود.

إذا سمحت لى سيادتكم النقطة الأخيرة: اللى هى الخاصة بالجهاز الفنى اللى هو أشار له الأخ لبيب شقير، يعنى أنا مع الأخ لبيب فى هذا ١٠٠٪، وإحنا تعبنا فيها جدا فى لجان مجلس الأمة. سيادتكم بتتصور إن الإقبال على اللجان بيبقى ليه نشاط، الحقيقة ده فى الأول إنما فى الآخر بنيجى ندعيهم من ٢٠ واحد مايجيش منهم إلا ٥ أو ٦ اللى هم مهتمين! إنما اللجان الفنية، دى أنا متصور وجودها مع الأمانات يعنى يجب إنها تتربط مع الأمانات، والمشروع المقدم والواقع فيه هذه الميزة أن ربط الأمانة يعنى ربط موضوعى كامل.

الأمانات دى أنا مش متصور إنها تمشى بالنظام اللى كانت ماشية بيه قبل كده فى الاتحاد الاشتراكى، أنا متصور الأمانة يعنى هى الأمانة الفنية هى اللى فيها المكتب الفنى، المكتب الفنى ده وثيق الصلة بالأمين والأمين ممول بكل المعلومات العامة. إنما لابد - أنا مع الأخ لبيب شقير - إنه لابد من إيجاد جهاز فنى لأن الواقع هو ده الـ back bone بتاع اللجنة، وفى العالم كله كده وفى جميع اللجان البرلمانية كده.

تفضل النقطة الأخيرة: اللى هى خاصة باللجنة التنفيذية بتاع الاتحاد الاشتراكى، سيادتكم فى مقدمة الموضوع حاطط التفرغ الأساسى، يعنى باستسمح سيادتكم أحط رأى آخر. أنا تصورى مش كده أنا تصورى إن اللجنة التنفيذية ١٠ و ٤ احتياطى، تصورى إن فيه قادة معينين سياسيين دول متكررين فى حدود عدد معين، دول ماسكين الناحية السياسية كأعلى لجنة فى البلد. بعد كده أنا متصور عدد يكون غير متفرغ، ليه؟ لأن اللى بيحصل يافندم، تصورى لو إن حصل لجنة تنفيذية متفرغة كاملة، إنها من المحتمل جدا - زى ما الأخ صدقى سليمان ما أشار بس يمكن أشار من بعيد شوية - اللجنة التنفيذية نفسها أمر من اثنين يابتفصل عن التنفيذ وصعوبات التنفيذ هى نفسها تبقى مفصولة من التنفيذ وصعوبات التنفيذ، ويبقى وجهة النظر التى أمامها هى وجهة

سرى للغاية

النظر للجهاز السياسى فقط، مقدامهاش وجهة نظر الجهاز التنفيذى أو قدامها وجهة نظر الجهاز التنفيذى على بعض؛ لأنه دائماً الجهاز التنفيذى بيبقى مصدق من القاعدة الشعبية. يعنى أنا كوزير مسئول من لجان الاتحاد الاشتراكى فى محافظة الشرقية وفى محافظة القليوبية، بيتعمل بيان معين عن عملية معينة أنا عاملها، هذا البيان بيبقى مصدق أكثر بكثير من الكلام اللى بقوله لطبيعته إنه جاى من قاعدة عريضة من عدد أكبر، وإن الوزير مضطر إنه يدافع عن نفسه.

فأنا خايف لو تفرغت اللجنة التنفيذية يعنى أمر من اثنين إما إنها تبقى لجنة كقيادة سياسية بحتة وجهاز التنفيذى معزول منها، يأما الجهاز التنفيذى يحس بالضغط عليه.. هيبقى ضغط من تحت من القاعدة الشعبية وضغط من اللجنة المركزية وضغط من اللجنة التنفيذية العليا للاتحاد الاشتراكى. إنما لو اتوجد طقم من الوزراء غير متفرغ مع التفرغ التانى على الأقل بيمثل وجهة نظر الجهاز التنفيذى، بيبقى القاعدة الشعبية ممثلة فى التفرغ اللى موجود.. اللجان بتبقى موجودة.

ده التصور بتاعى فيه الجهاز التنفيذى ممثل وجهة نظره، وطبعاً الأعضاء الاحتياطيين بيبقى من باب أدعى بيقوا غير متفرغين وتبقى الصورة ممسوكة أكثر.

عبد الناصر: هو أنا متفق بينى وبين نفسى إذا قعدنا أكثر من ساعتين الجمعة الجاية ماجيش! (ضحك)
زى ما عملت الجمعة اللى فاتت يعنى!